

DEO TRIUNO ADJUVANTE
DISSERTATIO INAUGURALIS
DE

AVOCATIONE CAUSARUM

Quam

Ex benevolo permisso Illustris atque
Magnifici Jctorum Ordinis in celebratissimâ
ad SALAM ACADEMIA
SUB PRÆSIDIO

VIRI PRÆ-NOBILISSIMI, CONSULTISSIMI atq; EXCELLENTISSIMI

DN. JOH. VOLK. *B*echmann/
Hæreditarii in *O*bern-*E*röbra/Jcti & Antecessoris

famigeratissimi, Consiliarii Saxonici meritissimi, Curia
Provincialis, Facultatis Juridicæ & Scabinatus Asses-
foris gravissimi,

DOMINI PATRONI, PRÆCEPTORIS ATQVE PROMOTORIS SUI
NULO NON OBSERVANTIÆ ET OBSEQVII CULTU
ÆTATEM DEVENERANDI

PRO LICENTIA

Summos in Utroque Jure Honores & Dignitates
Doctorales ritè ac legitimè consequendi

Publica Doctorum censura subjecit

CHRISTIANUS *B*iel/ Luneburgens.

In Collegio Jctorum

Ad diem

Septembris, horis ante-& pomeridianis.

JENÆ, TTPIS JOHANNIS WERTHERI, Typogr. Ducal. 1675.

DEO.
PATRIÆ.
PATRONIS.
ET.
FAVTOBIBVS.

I. N. D. N. J. C.

INTROITUS.

PRo Legali lauru Academicâ ritè ac legitimè impetrandâ consuetis examinibus exantlatis, habitaque Lectione, quæ vulgo dici solet, CURSORIA, cum quædam Dissertatio Inauguralis publicè quoque sit habenda, non absque ratione diu dubius hæsi, quodnam argumentum ex tam vasto & amplissimo materiarum juris Oceano mihi esset seligendum. Nonnulli enim in scribendo tales præprimis excogitant materias, quo ingenii acumen atque subtilitatem tantummodo possint ostentare, utilitatem verò si spectes, planè vel nullam, vel minimam in iis prehendes, quales recenset Hering. *tr. de Fidejuss. cap. 10. num. 102.* quas similes esse, dicit, araneorum telis, quæ plurimum quidem habent artificii, minimum verò utilitatis, quasque perinde nec scire compendium, nec ignorare detrimentum est

A 2

ullum.

ullum. Non mihi hæc mens , nec ratio. Deliberato enim ac consulto constituebam animo, illam potiùs depromere materiam, quæ ardua est partim, partim verò scitu pernecessaria, nec non in curiis judiciisque valdè frequentata. Et quoniam me ab Academicis studiis studium Praxeos jam **AVOCAT**, **AVOCATIO** etiam pro Disputationis Inauguralis argumento esto. Non autem quoslibet **AVOCANDI** actus proponere animus est, sed talem solummodo hac vice in medium proferre constitui **AVOCATIONEM**, quam Rebuffus in *Comment. ad Constitut. sive Ordinat. Regias in pr. de Evocat.* nominat permultis ignorant, à jurium interpretibus parum discussam & tractatam , frequentem tamen & necessariam, qua Princeps vel alius Magistratus superior lites coram inferiore iudice pendentes ad suum transfert iudicium. Hancque **AVOCATIONIS** telam Methodo in scholis consuetâ pro virili pertexere studebo. Ad quam itaque perficiendam **DEUS**, qui Magistratum vocat, rursusque avocat, esto principium, medium & terminus! *Novell. 109. pr.*

CAPUT

CAPUT I.

De

Avocatione in genere, ejus-
que Definitione tam Nominis,
quam Rei.

§. I.

Quanquam Causæ ibi debeant terminari, ubi judicium est semel acceptum *l. 30. ff. de judic.* ita etiam, ut nemo, licet postea alterius fori esse coeperit, in ea causâ jus revocandi habeat. *l. 7. ff. eod.* proindeque nulla causa pendens regulariter avocari queat. *Didac. Covarruv. practic. quæst. lib. 1. quæst. 9. numer. 1. Schrader. de feud. part. 10. sect. 1. num. 180.* sed judicii cursus integer & imperturbatus est relinquendus, minimeque per Avocationem turbandus. Attamen hæc assertio Limitationi huic subiacere videtur, nisi magna & necessaria subsit avocandi causa *Bald. ad l. 58. num. 2. ff. de jud.* quæ aut superiori arbitrium in inferiorem tribuit, aut inferiori potestatem procedendi demit. Illud contingere videtur, quando superioris est inferiori Jurisdictionem dare, & ex placito auferre. *l. 58. ff. de judic.* Hoc verò, quando Jurisdictio inferioris deficit, putà, quia illa jus postulantes frui non permittit denegando vel protrahendo justitiam, vel quia ut idoneus judex eâ uti nequit, si fortè inferior judex alterutri litigantium suspectus esse coeperit. *Faber in Cod. lib. 3. t. 1. Defin. 1. num. 4.* De hisce & similibus Avocationis causis in præsentî Dissertatione

tractaturus, consilium istud, quod peritissimum (ut apud *Lipsum lib. 5. Polit.* audit) in omni re bellicâ & civili scriptor *Polybius lib. 5. Histor.* nobis suppeditat: Eâ nempe, inquit, de re summum habendum est studium, tam discipulis, quam docentibus, ut rectè ordiantur, & ubi inchoaverint, ad finem quoque animo contendant: non sine fructu secuturus videbor, si à vocabuli Avocationis atque Causæ origine variisque significationibus Disceptionis initium faciam. In omni enim Tractatione fores pandit vocis explicatio, & nominatim illius ab omni ambiguitate liberatio, cum Rei explicatio promanet ex vocabuli significatione *l. 4. ff. de V. S.* & imposita sint nomina ad rerum cognitionem, unde verba dicuntur rerum notæ *l. 4. §. 2. ff. de Suppell. leg.*

§. II.

Descendit autem Avocatio ab avocando Præpositivâ Particulâ à, verbo Voco, quod originem suam debet Verbo *βοάω* Clamo *Becman. de Orig. Lat. Lingu. verb. Voco*, absoluteque idem est ac invitare, ut vocare ad cœnam, in jus, in concionem, in concilium uti passim hisce locutionibus utitur Oratorum parens. Unde & Vocatores; qui invitant, & Vocationes ipsæ invitationes sunt nominatæ. Hujus Contrarium est Avocare. Vocabuli Causæ verò originem nonnulli Philologorum adscribunt voculæ *Quæso*, mutando Q. in C. cum sint cognatissimæ literæ, ut altera in alteram vertatur, uti videre est in verbo Concutio, quod à quatio nomen habet, sicut Græcum vocabulum *αἰνῶ* ab *αἰνία*. Nonnulli verò simplicissimam existimant esse Derivationem Causæ à Casu, qualem etiam Jus Canonicum observat in *cap. 10. X. de U. S.*

§. III.

§. III.

Sumitur autem Avocatio duobus potissimum modis I. pro Inhibitione, unde in Camera Imperiali dicuntur Mandata Avocatoria, quibus violatores pacis publicæ sub pœnâ Banni arcentur, ut ab istiusmodi violento factō & invasione desistant, atque a quo jure ac justitiâ sint contenti. Blum. *Process. Cam. tit. 29. num. 243.* II. Pro Advocatione, ita nimirum, ut notet & actionem Avocantis & passionem Advocati, uti etiam hic talem Avocationem attendimus, & est quasi causæ coram inferiore judice inchoatæ, ad se vocatio, qua etiam insimul vetatur, ne judex inferior ulterius de ea cognoscat. Cum Causæ quoque vocabulum de multis usurpetur rebus, merito etiam jure, priusquam ulteriùs progrediamur, illius ambiguitatem, & quomodo illam voculam hic accipere volumus, paucis demonstraturi sumus. Non autem hâc voce notare volumus negotium quoddam, ex contractu vel quasi descendens, qualem significationem isti tribuit *l. 9. pr. ff. de R. C. l. 9. §. 2. ff. de Auct. Tut.* neque utimur hoc vocabulo pro ipso Contractu, ut in *pr. l. de Auct. Tut. l. 11. ff. de V. S. & §. 6. l. de Legat.* neque pro ut sumitur in inscriptione Tituli *ff. de Usuris & fructib. & omni causa & in l. 4. C. unde vi*, quatenus nimirum omnem utilitatem ex re provenientem denotat, nec hîc Causam acceptamus pro Conditione ut in *l. 13. C. qu. dies leg.* nec pro ipso jure *l. 18. §. 2. ff. de pignor. Act.* nec pro titulo debiti, Actionis, Dominii ut *l. 32. ff. de reb. auct. jud. poss. l. 3. §. 4. ff. de acquir. vel amitt. possess.* neque pro argumento, ex quo eliciuntur quæstiones, de quibus est disputandum, uti usurpatur in jure Canonico, part. 2. Decreti. Sed per vocabulum Causæ hoc loco intelligimus negotium, quod in judicium est deductum in

sc

se habens controversiam, uti usurpatur *l. 4. C. de pact. l. 16. C. de Transact. t. t. C. ne liceat in una ead. caus. tert. prov. Et t. t. C. ubi caus. fiscal.* Sic dicimus Causam orare seu perorare. *Cic. de Orat. lib. 11.* Causa cadere *Id. lib. 1. de finib. causam remittere &c.* Unde quoque Advocati dicuntur Causidici *l. 6. pr. l. 7. C. de postul. l. 7. l. 17. C. de Advocat. div. judicior.* ab eo scil. quod causam in judicio dicant & perorent, ut est in *l. 11. §. f. C. d. t.*

§. IV.

Synonymizæ fœdus cum Avocatione videntur habere quoad præsentem materiam Advocatio. *Manfred. tr. de Attent. part. 2. num. 11.* Evocatio *Gvid. Pap. Decis. 440.* Revocatio *cap. 56. X. de Appell.* Regulariter tamen Avocatio & Evocatio inter se differunt. Quippe per Avocationem causæ coram inferiore judice pendentes ad superioris trahuntur tribunal. Per Evocationem verò subditi ad externa citantur judicia; unde etiam Privilegium de non Avocando subditos Statibus Imperii concessum, & de non Evocando ad judicia externa sunt duo singularia, & separata Privilegia, uti docet *Roding. Pand. Cam. tit. 3. lit. m.*

§. V.

Nominis inspectionem sequitur Definitio Rei, quæ est fax totius tractationis, imò potissima rei pars, quæ perspecta, totum facile percipitur negotium. *Gædd. Diss. ad ff. 1. th. 1. lit. a.* Describitur autem à *Gail. lib. 1. Obs. 41. num. 8.* quod sit litis coram inferiore pendens ad superiorem absque provocatione facta translatio. Aliter autem illam describit *Wames. in cap. 56. de Appell. num. 1.* nimirum, quod nihil aliud sit, quam causæ coram inferiore ritè introductæ, nec dum sententiâ terminatæ, ad supe-

superiorem translatio. Et quanquam omnes hæ Descriptiones facillimo negotio possint servari; attamen propter usum hodiernum cum *Vultejo ad l. i. C. de Jurisdict. omn. jud. num. 169.* ita Causæ Avocationem nobis describere placet; Quod sit litis pendentis coram uno ad alium judicem citra Appellationem facta translatio.

§. VI.

Generis loco in nostrâ Descriptione ponitur litis translatio. Transfertur autem lis in judiciis variis modis, vel ratione litigantium, vel ratione ipsorum judiciorum. Ratione litigantium & quidem Principalium per Actionis cessionem *l. 27. §. 1. ff. de Procurat.* Minus Principalium verò per Revocationem ex causa legitima vel sine causâ, procuratore & adversario consentientibus *l. 22. C. de procurat.* Ratione verò judiciorum præter nostram Causarum Avocationem lites etiam transferri solent, vel per beneficium Supplicationis *l. un. C. de sent. Præf. Præf. Auth. Quæ supplicatio. C. de precib. Imp. off.* vel per Appellationis modum *vid. t. t. ff. & C. de Appellat.* Vel denique per Revisionis Remedium, mediante quo per sententiam à Camera latam læsis ex quâdam benignitate per Commissarios Imperatoris & Statuum Imperii ad id deputatos succurritur. *Joh. Ludov. Bender. de Revis. Conclus. 1.*

§. VII.

Diximus, quod sit Litis pendentis translatio. Siquidem lis, quæ nondum est, minimè dicitur transferri & avocari. Ostendunt itaque hæc verba differentiam, inter Appellationem, Supplicationem & Revisionem,

B

quip-

quippe quæ causæ cognitionem ad judicem superiorem
regulariter post latam ab Inferiore judice sententiam, &
ita post litem coram eo finitam transferunt. *t. i. ff. C. de
Appell. l. un. C. de sent. Praef. Prat.* Quando autem lis pendere
incipiat, de eo non omnium JCtorum eadem est opinio.
Nonnulli enim existimant, litis pendentiam demum fie-
ri post litem contestatam, moti fortassè hocce argumen-
to; quoniam ante litis contestationem propriè lis non
est, sed controversia *per l. 25. §. 7. ff. de Hæred. pet.* quæ
controversia per litis contestationem lis esse incipit, ita-
que ante eam, lis, quæ nondum est, pendere dici non
potest. Quâ ratione etiam nonnulli accipiunt *l. 30. ff.
de judic.* quod iudicium dicatur acceptum post litem
contestatam. Quod idem sensisse videtur Constanti-
nus Imp. in *l. 4. C. de Jurisd. omn. jud.* disertis verbis di-
cens, post litem contestatam examen ordinariæ sedis de-
clinari non debere, quia è contrario ante eam id fieri
possit. Hoc quoque cum Constantino comprobatur Ul-
pianus in *l. pen. ff. de Jurisd. dict.* ubi exemplum ponit in
puella, quæ litem apud competentem judicem suscep-
erat, i. e. ut illius sententiæ patroni volunt, quæ litem con-
testata fuerat. Sed ratione Avocationis nostræ proba-
bilior, atque in praxi receptior videtur esse illorum sen-
tentia, qui constanter affirmant, solam citationem sive
in jus vocationem inducere litis pendentiam, etiam si
lis nondum fuerit contestata. Id quod etiam expressè
definire videtur Ulpianus in *l. 7. ff. de jud. & §. ult. l. de
pen. tem. lit.* cui sententiæ quoque calculum suum ad-
didit Pontifex in *cap. penult. X. de foro compet.* Et hæc
opinio usu & moribus est recepta, testante Illustri DNO.
Struvio, Patrono atque Promotore eâ, qua par est, obser-
vantia submissè colendo in *Synt. jur. civ. Exerc. 46. th. 5.*
num.

num. 2. Herculan. in tr. de Attentat. cap. 6. n. 7. Ut autem talis citatio litis pendentis effectum operetur, imprimis sex notant Doctores requisita: 1. quod citatio emanaverit, 2. quod emanaverit à iudice competenti. 3. quod ad citatum pervenerit, aut per eum steterit, quo minus perveniret. 4. quod ex tenore citationis citatus plenè cognoscere potuerit, quæ de re futura sit quæstio. 5. quod citatio sit aperta, & 6. quod nuncius eam legitimè & sufficienter insinuaverit. *Mynsing. cent. 4. Obs. 26. n. 2.* Et hætenus dicta, sunt tantùm intelligenda de litis pendentia respectu Rei. Actoris enim respectu lis pendere incipit, non quidem à porrectâ supplicatione *arg. l. 1. & 2. C. qn. lib. princ. dat. lit. cont. fac.* Sed tum demum, quando decreta Citatio ad Actoris pervenerit notitiam, licet nondum sit expedita & Reo insinuata. *Blum. Proc. Camer. tit. 25. §. 35.*

§. VIII.

Uterius dicitur, coram uno ad alium. Id quod non de omnibus iudicibus indistinctè intelligendum esse volumus, sed tantum de iis, quibus hoc ius ratione superioritatis atque imperii majoris in inferioris Jurisdictione competit. *l. 58. ff. de judic.* Cum enim superior iudex inferiorem iudicem non agnoscat, nullo modo etiam causam coram superioris tribunali pendentem inferior avocare potest, quippe inferior in superiore nullum imperium habet, & ne quidem per appellationem devolvitur causa à superiore ad inferiorem *l. 1. §. 3. ff. de Appell.* Bender, *tr. de Revision. in proæm. num. 8.* Sed si quædam causa à superiori sit recepta, quæ ad inferioris forum fortasse spectaret, potest inferior coram superiore pro suo interesse comparere, incompetentiæque ex-

ceptiones suas allegare. Unde quoque nullus Imperii Princeps atque Status suum subditum in Camera Imperiali ab alio in jus vocatum, vel vigore Privilegii, vel ex aliâ causâ directò potest avocare; Sed comparens potest suum Privilegium, per modum Exceptionis, uti usus ibi comprobatur, opponere, nec non alias incompetentiæ Exceptiones exhibere, hocque modo Jurisdictionem declinare Cameralem, uti observat experientissimus Praxeos Cameralis Gail. *lib. 1. Obs. 41. num. 7.* eumque secutus Roding. *Pandect. Cam. lib. 1. tit. 3. §. 10.* Sic quoque, cum nec par in parem habeat imperium *l. 13. §. 4. ff. ad SCtum Trebell. Novell. 23. cap. 4.* ita quoque nec hos habere directam à se invicem causas Avocandi potestatem, manifestum est: Siquidem Avocatio absque imperio fieri nequit. Vultej. *ad l. 1. C. de jurisd. omn. jud. num. 173.*

§. IX.

Ultimo denique considerata veniunt verba: **Citra Appellationem.** Appellatio enim non aliter ritè interponitur, nisi per sententiam à iudice inferiori lis in eâ Instantiâ fuerit finita: Per Avocationem verò causa ad superiorem transfertur lite adhuc coram inferiore iudice pendente, uti supra §. 7. dictum fuit. Deinde quoque in hoc Appellatio & Avocatio inter se distant, quoniam Appellatio saltem conceditur ad partis per sententiam iudicis inferioris gravatæ sive scriptis *l. 1. §. 9. ff. Quand. Appell. sit.* sive vivâ voce per verbum Appello *l. 2. l. 5. §. 5. ff. de Appell.* ritè factam interpositionem, & subsecutam partis appellantis petitionem. Avocatio verò non semper ad partis petitionem, sed etiam pro causæ gravitate à Magistratu superiori fieri solet, uti pluribus infra dicetur. Tertiò & hæc inter Avocationem & Appel-

pellationem notatur Differentia, quod desertâ Appellatione Jurisdictio redeat ad judicem, à quo est appellatum, ita ut sententia ab eo lata transeat in rem judicatum, & perinde sit, ac si nunquam interposita fuisset Appellatio. *l. 5. §. 4. C. de temp. & reparat. appell.* Paria enim sunt, aut ab initio non appellasse, aut Appellationem interpositam non introduxisse, sive interpositam profectum haut fuisse. Anton. Fab. in *C. lib. 7. tit. 27. Des. 14. num. 1.* quod tamen diversum est in Avocatione. Hæc enim semel facta & intimata, licet à partibus fuerit desertâ, attamen nunquam causa redit ad illum judicem, à quo avocata est, nisi à superiore expressè ad illum remittatur. Rebuff. *Comment. in Const. Reg. tr. de Evocat. quest. 11. num. 28.* ubi quoque plures inter Avocationem & Appellationem differentias notatas invenies.

§. X.

Quia ordo est Enrium Magister Bartol. in *l. 1. n. 4. ff. de acquir. poss.* veritatique proximus, qui benè distinguit. Qui autem hoc seposito ulterius progreditur, equum per caudam frænare non absurdè dicitur à Warem. ab Ehreberg. *tr. de Fæder. lib. 1. cap. 1. pag. m. 77.* Visà itaque ac declaratâ Avocationis Descriptione, ad evitandam confusionem illius Distributionem necessariò subjiciendam esse arbitramur. Duplicem autem vulgò faciunt Avocationem, Expressam scil. & Tacitam. Expressa est, quæ fit à superiore per verbum Avocamus. Tacita verò est, quæ fit, quando superior de causâ vel ipse cognoscit, vel alteri illius cognitionem delegat. *De quibus infr. plar.* Sed hæc Distinctio non videtur universam Avocationis naturam explicare, sed tantummodo illius formam attingere.

§. XI.

Quoniam autem omnis Avocatio regulariter & propriè à superiore fieri solet, uti supra §. 8. est ostensum, non immeritò illam cum Vultej. *add. l. i. C. de jurisd. omn. jud. num. 172.* herciscere possumus in *Propriam & Impropriam*. *Propria* dicitur, quæ sit à Principe vel alio quocunque Magistratu superiore, qui inferioris Jurisdictionem pro arbitrio revocare potest. *Impropria* verò dicitur, quâ par à pari subditum coram extraneo judicio in præjudicium Domini in jus vocatum avocatur. Et hæc Avocatio Imperii Octoviris specialis Privilegii vigore competit. Illorum enim subditi ad nullum aliud tribunal præterquam illorum Electorum citari atque evocari possunt. Si itaque fortè quis coram extraneo quodam iudice se sistat contra Privilegium, inque ejus Jurisdictionem consentiat, à Dominis Electoribus ille subditus avocari potest. *Limn. ad A.B. tit. 11. §. 1. Obs. 7. Gail. lib. 1. Obs. 40. num. 4.* Quod Privilegium verò hodiè nomen suum amisit, & in Jus Commune ad reliquos etiam Imperii Procures ac Status extensum transit. *Carpzov. Diss. Feud. 6. quest. 1. num. 10.* Status enim Imperii hodiè non jure Magistratus, aut per modum ordinarii vel extraordinarii mandati Jurisdictionem obtinent, sed jure territoriali, hæreditario perpetuo & ad hæredes transitorio illam ipsam possident; Et quemadmodum ex feudo ita fructus in Vasallos transferuntur, ut nullâ ratione quoad horum perceptionem ab ullo, ne quidem à Domino ipso sint turbandi. *Rosenthal. de Feud. cap. 5. Concl. 5. n. 3.* Ita quoque nec in Jurisdictione, quæ dicitur pars fundi, turbandi erunt. Id quod etiam Rex Romanus recens electus juramento confirmare debet. *vid. Cap. Cæs. Invisibilissimi nostri Leopoldi vers. 18. Much sollen und wollen*

wollen wir die Chur-Fürsten / Fürsten / Prälaten /
 Graven / Herrn und andere Stände des Reichs / in-
 gleichen auch die ohnmittelbare Reichs Ritter-
 schafft / und deren allerseits Unterthanen im Reich. c.
nec non in Ordin. Camer. Imperialis dispositum legitur.
part. 2. tit. 1. pr. Erstlich ordnen und setzen wir / daß
 alle des Heiligen Reichs Verwandte und Untertha-
 nen bey ihren ordentlichen Inländischen Rechten und
 Gerichten gelassen. etc. Hinc apparet, quod omnes
 Imperii Status immediatè Imperio subjecti hodiè hoc
 Privilegium habeant concessum, ut nemo eorum subdi-
 tos coram aliò Tribunali, & præsertim Rotvvilensi in-
 jus vocet. Gail. *dict. Obs. 40. num. 2.* & si forte contra tale
 Privilegium quis fuerit vocatus, possunt illi ipsum revo-
 care. Id quod in Ducatu Würtembergico, si illius Du-
 catus subditus aut etiam Vasallus (quamvis liber nobilis)
 oder ein ander so einen solchen Stand zu versprechen
 stehet sit evocatus, per literas Cancellariæ nomine Prin-
 cipis emanatas fieri solere, testatur cum Georg. Ludov.
 Vindenspur Speidelius in specul. Observ. Jurid. Polit.
 Philol. Histor. in voce *Abfoderung*. Si autem hoc & si-
 mili casu Avocationi non detur locus, Status Cameram
 Imperialem vel Judicium Aulicum possunt adire atque
 per Appellationem jus suum prosequi. Quemadmo-
 dum quotidie in talibus casibus à Judicio Rotvvilensi ad
 Cameram appellatur. Gail. *d. Obs. 40. num. 4.* Et
 tantum de Avocationis generalibus.

Nunc accessum faciamus

ad

CAPUT

CAPUT II.

^{De} Causa Efficiente.

§. I.

Quanquam supremæ potestati annexa sit Universalis Jurisdictio, tanquam de forma & substantia illius existens, uti de Sacrà Cæsareâ Majestate scribit Surdus *Consil. 275. num. 7.* Attamen, quando ex illa, ut ex fonte in alios, sive concessione ipsius, sive ordinarii Jdictionis ministerii constitutione ad alia derivatur judicia, inde formam legemque accipit, quâ astringitur superioris Jurisdictio, ita ut extra illam Imperator, Rex vel alius superior Magistratus semet Jurisdictione privasse dicatur. *Thesaur. Decis. 132. num. 2.* Inde est, quod nemo lite semel constituta se implorato Principis extraordinario auxilio ordinarii judicis competentis Jurisdictioni subtrahere potest, sed sententiam à judice semel approbato expectet, necesse est. *l. 52. pr. ff. de judic. l. 4. C. de Jurisd. omn. jud. Nov. 53. cap. 3.* Quippe cujuscunque Reipubl. imò Gentium jus pro lege judiciorum fundamentali recepit, ut alius non judicet, quàm cui judicandi jus competit, ne scilicet Jurisdictiones confundantur. *d. l. 4. C. de Jurisd. omn. jud.* Id quod tamen de illà Jurisdictionis concessione intelligendum esse existimamus, quæ per modum ordinariæ Jdictionis facta fuit, ita, ut sit exercentis propria, quæque exerceri possit nomine proprio, non alieno. Quod tamen secus in iis, quibus tantummodo ab aliquo nudum jurisdictionis exercitium est commissum. Et quemadmodum ejusmodi exercitium ab iis per Superioris committentis revocationem auferri in-

ri inque alios transferri potest. *arg. l. 58. ff. de judic. ita-*
quoque causæ particularis cognitionem superior per
avocationem ab iis auferre haut prohibetur.

§. II.

Consistit itaque Avocationis Causa Efficiens in su-
perioritate & quidem illius Jurisdictionis, ex qua causa
avocanda erit; secundum quam scilicet quis liberè cui-
dam judicandi potestatem tribuere, & rursus auferre
potest. Cui enim liberum fuit Jurisdictionem dare,
vel causæ cognitionem huic vel illi committere, ille et-
iam eandem Jurisdictionem revocare, & quocunque in
statu prohibere potest, ne iudex ab eo datus de causa illa
ulterius cognoscat *d. l. 58. ff. de jud.* Etenim is regulari-
ter potest destituere, qui instituere. *cap. 12. in f. X. de be-*
ret. Et sicuti mandare vel non mandare Jurisdictionem
est in arbitrio Proconsulis, ita quoque adimere manda-
tam. *l. 6. §. 1. ff. de Off. Procons.*

§. III.

Non itaque solus Princeps Avocandi potestatem
habet, sed etiam quilibet alius Magistratus superior in
eadem specie Jurisdictionis potest Causas coram Judi-
cibus suis inferioribus pendentes ad se vocare. *arg. d. l. 58.*
Et ideo Imperii nostri Principes, Comites, Barones, Ma-
gistratus Civitatum Imperialium & quilibet habentes su-
periores Jurisdictionem causas coram inferiori iudicio
pendentes tacitè vel expressè avocare possunt. Hieron.
Manfred. *tr. de Attentat. part. 2. n. 11.* Quin & is, qui Jdi-
ctionem habet in Oppido vel pago, eamque alicui man-
davit exercendam non suo nomine, sed nomine commit-
tentis, libere valet avocare causam absque iudicis & tri-
gantium injuriâ, *Carpz. lib. 2. tit. 2. Resp. 20. num. 6. & De-*
cis. 97. n. 18. Sic Elector vel alius Dux Saxoniz causas co-

C

ram

ram Quaestore vel Senatoribus oppidanis pendentes
 advocare haut prohibetur. Berlich. *part. 1. Concl. 6. n. 12.*
 Et cum Officialis de causis ad Episcopi forum spectanti-
 bus illius vices supplendo cognoscat, Episcopusque so-
 lus liberè Officiali Jurisdictionem illam committat, &
 idcirco idem Episcopi & Officialis Consistorium nomi-
 netur, *cap. 3. de Appell. in 6. & cap. 2. de Consuet. in 6.* me-
 rito jure & Episcopo jus advocandi ab Officiali competit.
 Simili modo cum in Civitatibus Praefecti Judicii inferioris
 des *Nieder-Berichts* administrent justitiam non ut
 Ordinarii, sed ut à Senatu delegati iudices. Mævius ad
 Jus Lub. *lib. 5. tit. 1. n. 3.* itaque & ab his, quin Magistratus,
 cujus est das *Ober-Bericht*/ possit causas advocare, non
 dubitandum est. Quod advocandi jus Magistratus civitatis
 Luneburgensis patriæ meæ charissimæ splendidissimus
 sibi per expressum reservavit statutum, quod habetur
part. 1. tit. 1. Was vor Sachen an das Unter-Bericht
 gehören. *in verb.* Jedoch soll uns iederzeit frey stehen/
 dieselben vom Unter-Bericht an das Ober-Berichte
 zu avociren und zu nehmen.

§. IV.

Ut autem procedat Avocatio, necesse est, ut advocans
 sit solus illius Jurisdictionis superior. Nullum itaque
 Avocatio habet effectum, quando plures unum consti-
 tuerunt Dicasterium, fortè, si tale ob propinquam inter
 eos necessitatem ad judicandas subditorum causas sit in-
 stitutum, & unus illorum velit causas coram Dicasterio
 communi pendentes cæteris invitis & ignorantibus avo-
 care. Berlich. *part. 1. Concl. 6. n. 3.* Illius enim Jurisdictio
 non est cujuslibet Principis communis in solidum, sed
 omnium communis. Vultej. *ad d. l. 1. C. de Jurisd. omn.*
jud. n. 173. vers. Non puto idem juris esse.

§. V.

§. V.

Non autem facultatem Avocandi illi concedamus, qui habet Jurisdictionis concurrentiam. Blum. *Proc. Camer. tit. 25. n. 46.* quæ esse solet inter duos, pluresve iudices, quibus & inter personas illas, quæ litigant, & de causa illa, quæ est controversa, & in loco illo sive territorio, in quo controversia est, competit Jurisdictio. Vultej. *tract. de judic. lib. 1. cap. 4. n. 197.* Quanquam itaque Sacra Cæsareâ Majestas, quin de jure Romanorum communi avocare possit, nullum sit dubium *per l. 58. ff. de jud. Anton. Petr. de Petr. in tract. de Potest. Principis cap. 6. n. 69.* ubi etiam hoc ad alios Principes superiorem non recognoscentes extendit. Hanc tamen Decisionem haut posse indistinctè accommodari ad præsentem Imperii Romano-Germanici statum, cum Reusnero asserit. Zanger. *tr. de Except. part. 2. cap. 1. n. 419.* præsertim cum ab Imperatoribus summo Camerali judicio concurrens sit concessa Jurisdictio. vid. *Ordin. Jud. Aulici Ferdinand. III. tit. 2. vers.* So wollen wir auch/ daß unser Reichs Hof-Rath sonsten/ und in denen Fällen/ darinnen wir/ und unsere Vorfahren am Reich/ unserm Camer-Gericht concurrentem Jurisdictionem, zu mehrerer Befoderung der Parthenen/ und unserer Übertragung mitgetheilet haben/ demselben seinem starcken Lauff lassen und per avocationem causarum nicht hindern/ wann nemlich solche Sachen albereit daselbst durch ausgewürckte und insinuirte Citation anhängig gemacht worden etc. *Gail. lib. 1. Obs. 121. n. 3. Bender. in Proæm. tr. de Revis. Act. n. 16. Wurmser. Exerc. Jur. Publ. Ex. 7. th. 25. Blum. d. tit. 25. n. 41.* & proinde Imperator causas in Camerâ pendentes per causarum Avocationem impedire non potest. Magnif. DN. PRÆSES, Patronus atque

Præceptor meus submissâ animi observantiâ ætatem de-
venerandus, *ad A. B. Exot. 6. n. 31.* Ita quoque in primis
Camera Imperialis est provisum principiis. *Cammer-
Gerichts-Ordnung zu Worms. de anno 1495. rubr.*
*Das Cammer-Gericht soll seinen starcken Lauff ha-
ben.* Deinde semper inter leges fundamentales repe-
ritum Ordinationique Camerae *anno 1555. concinnatæ
part. 2. tit. 35.* plenius insertum, Recentiorique Recessu
Imperii *anno 1654. §. Ebenmässig sollen 166. renovatum:*
Imò hodiè quoque Rex Romanus recens electus jura-
mento adstringitur, ut ne velit Cameralis justitiæ cursum
ullâ viâ turbare, causasque pendentes avocare, uti appa-
ret ex Capitulationibus Cæsareis imprimis Ferdinandi
III. §. Und insonderheit 27. & moderni invictissimi Impe-
ratoris Leopoldi. §. Ob auch einiger Chur- & Fürst 26. Si
itaque partes prius Camera, quam Imperatoris aulam
justitiæ consequendæ gratiâ adeant, citationemque ibi
impetrent, jure præventionis, quâ præoccupata est illius
Jurisdictio, Jurisdictione Cæsareâ aulæ exclusâ, causa
ibi tantummodo agitari debet. *Heig. part. 1. quæst. 9. n. 34.*
Et si talis causa ab Imperatore postea fortassè avocaretur,
tamen non attentâ istâ avocatione Camerae judicem ni-
hilominus posse procedere, ostendit præjudicio ex sen-
tent. Cameral. Bartii desumpto Roding. *Pandect. Camer.
lib. 1. tit. 3. num. 9. in Addit. & Blum. Process Camer. tit. 25.
rb. 16.* Imperatorem autem unâ cum Imperii Statibus pos-
se causas ad Camera pertinentes, ibique pendentes ad
Cõmitia scil. avocare, non est diffitendum. Sicuti enim
Imperator & Status unanimo consensu per Ordinatio-
nem Cameralem de non avocandis causis in Camera
pendentibus disposuerunt: ita quoque per unanimum
dissensum talem dispositionem ratione particularis eu-
jusdam

jusdam causæ, quæ avocanda erit, tollere haut prohiben-
tur. *l. 23. inf. ff. de LL. l. ult. pr. ff. de Const. pec. l. 1. §. 19. ff.
de question.* Sublatâ enim lege prohibitivâ, avocatio lo-
cum habebit. Blum. *dict. t. 25. tb. 23. & seqq.* ubi etiam ra-
tiones pro contrariâ adduxit sententiâ. Videatur quoque
Roding. *ff. Cam. lib. 1. tit. 3. n. 9. lit. I.* qui pro stabilienda
hac sententia moderni Imperatoris Capitulationem, in
qua de avocatione processus super teloniis inter quatuor
Electores ad Rhenum agitati aliquid est insertum, alle-
gavit.

§. VI.

Deinde Imperatoris potestas ita quoque limi-
tata est hodierno tempore, ut ne quidem causas coram
inferiori Statuum Imperii, putâ Principum, Comitum,
Baronum, judicio pendentes avocare possit. Siquidem
Imperii constitutionibus satis luculenter cautum reperi-
tur, Statuum subditos in ordinariis judiciis relinquen-
dos, nec ullo modo, nisi in causis exceptis, avocandos es-
se. vid. *Ordin. Cam. part. 2. tit. 1. pr. & §. 2. fit. 5. §. 1.* quod
etiam in capitulationem Caroli V. & sequentium Impe-
ratorum relatum legitur. *vid. Capitul. Carol. V. art. 15. in
verbis.* von ihren ordentlichen Richtern nicht drin-
gen/ersodern/ noch fürbescheiden. & Ferdin. I. art. Auch
die Chur-Fürsten etc. Rudolphi II. art. Auch die Chur-
Fürsten/ & insequentium. *vid. qq. capitul. Leopoldi Im-
perat. art. Auch sollen und wollen wir etc. 18.* Quippe
cum Principes Imperii jure hæreditario perpetuo, & ad
hæredes transmissibili sint investiti, jurisdictionem non
administrationis titulo, sed jure patrimonii in vim utilis
Dominii possident. ideoq; in ea non minus, quàm in fru-
ctuum perceptione turbari debent. Reink. *de Regim. sec.
& Eccl. lib. 1. cl. 5. cap. 7. n. 22. vid. th. 11. cap. antec.*

§. VII.

Diximus in §. antecedenti, quod si plures habeant Jurisdictionem concurrentem, interque illos detur præventioni locus, quod tunc non inveniat locum Avocatio. Unde in propatulo est, Electorem Saxoniz causas à curiali judicio per præventionem præoccupatas ad suum Electorale judicium transferre non posse. Non enim dubitandum est quin Elector Sax. cum dicto curiali judicio habeat concurrentem Jurisdictionem, uti asserit Berlich. *part. 1. pract. concl. 6. th. 7. & seqq.* Sic etiam Legatus Pontificis, quoniam cum omnibus ordinariis judicibus in Jurisdictione concurrat. Manfred. *tr. de Assens. lib. 1. part. 2. n. 11.* & ratione præventionis illius Jurisdictio occupatur. Rebuff. *in Comment. ad Const. f. Ordin. Reg. tr. de Evocat. quest. 5.* ex sua persona sine expressa concessione non potest causam coram Episcopo inceptam avocare.

§. VIII.

Et cum Princeps quoque, sive alius Magistratus superior, ut juri naturali obnoxius pacta cum subditis suis inita non aliter, atque alius privatus servare debeat *l. 1. ff. de pact.* Berlich. *part. 1. pract. Concl. 6. n. 5.* ita, ut teneatur observare omne id, quod promisit, & contravenire haut possit Gail. *cum multis aliis Doctorib. lib. 2. Obs. 55. n. 7.* Unde non immerito etiam superiori denegatur Avocatio, quando interior à superiore Jurisdictionem interveniente contractu vel quasi accepit, etiamsi superior ejusmodi sit Imperator Romanus, vel Rex vel alius Princeps superiorem etiam haut recognoscens, uti multis Jurisconsultorum auctoritatibus probat Schrader. *tr. Feud. part. 10. sect. 1. n. 182.* Quippe hujusmodi per contractum celebrata Jurisdictionis concessio abdicativè sive privativè

tivè facta præsumitur. Berlich. *part. 1. Concl. 2. n. 16.* ita ut Princeps omnia ad illam Jurisdictionem pertinentia cum omni causarum cognitione in inferiorem quoad illius instantiam transtulerit. Et quoniam Feudum, illique ad hærentia per Contractum constituentur, Illustr. Dn. Struv. *Syntagm. Jur. Feud. § 8. apb. 3. num. 2.* hinc non permittitur Domino Feudi, si Vassallus de Jurisdictione alicujus loci sit investitus, ut se cognoscendo in primis causis h. e. in primâ instantia intromittat, causasque ad forum Vassalli pertinentes per avocationem ad suum trahat forum. Schrader. *d. part. 10. sect. 1. n. 180.* Rosenthal. *de Feud. cap. 5. concl. 5. n. 4.*

§. IX.

Ab omnibus itaque iudicibus inferioribus, qui ordinariam habent Jurisdictionem causæ pendentes hodie advocari nequeunt. Et licet ad superiorem devolvatur causæ cognitio per appellationem ratione superioritatis, attamen exinde ei haut competit jus advocandi Covarruv. *dict. quæst. Pract. cap. 9. n. 2.* Hic non inconvenienter potest moveri hæc quæstio: An Imperator, vel Camera Imperialis causas coram Austregarum Iudicio pendentes per Avocationem possint transferre ad Imperatoris vel Camera Imperialis cognitionem? Et quanquam nihil certi ratione Jurisdictionis terminandæ, an Austregarum scilicet Jurisdictio sit Ordinaria, an verò delegata, an verò mixta, statuere liceat, cum ad utramque partem & pro ordinariâ, delegatâ & mixtâ tantæ jurisconsultorum propugnant auctoritates, & quidem pro Ordinaria est Illustris D. Strauchl, J. C. t. nostri ævi Consummatissimi, Promotoris sanctè venerandi. in *Colleg. ad Ordin. Cam. p. 2. tit. 2. quæst. 2. Limn. Jur. Publ. lib. 9. cap. 5. n. 49.* pro delegata verò est Auctoritas B. Dn. Sinold. *cogn. Schult. Colleg. Jur. Publ. vol.*

vol. 2. Diss. 3. th. 12. lit. C. Vultej. ad l. 1. C. de Jurisdic-
t. omn. jud. n. 86. Rutg Ruland. de commiss. p. 1. lib. 1. cap. 5. n. 2.
Et lib. 3. c. 5. aliorumque qui citati sunt à B. Dn. Schuss. d. l.
Nonnulli autem mixtam esse Austregarum Jdictionem
asserunt, cum neque purè & simpliciter sit ordinaria ne-
que purè delegata, cum de utriusque Jurisdictionis re-
quisitis participet. Magn. Dn. Præses. Exot. ad A. B. 6. n. 72.
Attamen non attentà tantà tantorum Jurisconsultorum
ratione Jurisdictionis Austregarum pugnà nihilominus
aliquid certi in proposità quæstione possumus statuere,
cum Responsionem nobis suppeditet ipsa Imperii Con-
stitutio, quæ habetur in Instr. Pacis Novissimo art. 5. §. 55.
vers. Caterum, ubi expressè cautum est, quod non
tam in Aulico, quàm Camera Imperialis judicio Privile-
gium primæ Instantiæ, Austregarum jura, & Privilegia de
non appellando Statibus Imperii illibata permanere, nec
per mandata, aut avocationes, aut quovis alio modo tur-
bari debeant. Id quod etiam reperitur dispositum in
Ordin. Jud. Aulici Ferdin. III. tit. 2. in verb. Wir befehlen
auch hiermit unsern Reichs Hof-Raths Präsi-
den und Râthen ernstlich/ daß sie in Erkennung der
Citationen/ Rescripten/ Mandaten und andern Proce-
ssen/ nicht bloß allein unser Kaiserl. Hoheit/ sondern
auch unsere und des H. Reichs Chur-Fürsten/ Für-
sten/ Braven/ Herren-Stände Gefreyter Reichs-
Ritterschafft/ Reichs-Städten/ und andern mittel-
und unmittelbahren Unterthanen/ Privilegia der er-
sten Instantz, Jura Austregarum, Privilegia de non Ap-
pellando, und der Summa/ unter welcher man nicht
appelliren/ und die Sache an höhere Gerichte brin-
gen kan/ aller Gebühr nach sorgsamlich in Acht neh-
men/ und den Reichs-Ständen unberühret verblei-
ben

ben lassen/ dartwider auch durch Mandata, Commissiones, Avocationes oder auf einige andere Weise niemand beunruhigen/ oder beschweren etc. Exceptis autem iis causis, in quibus Judicium Austregarum non attenditur, de quibus infra. An verò Princeps possit causas ab Universitatibus avocare? vid. Berlich. *part. 1. Conclus. 6. num. 19.* Et hæc de Causa Efficiente, sequitur

CAPUT III.

De

Causa Materiali.

§. I.

Explicatis iis, quæ ad causam Efficientem pertinere nobis visa sunt, nunc Methodo sic suadente ad causas ipsas, quæ in iudicium venire, avocationisque juri subjacere solent, progredior. Earum autem summa est divisio in Civiles & Criminales, utraq; vel Ecclesiasticæ vel Seculares, utraq; iterum aut merè Ecclesiasticæ vel seculares, aut mixtæ. Merè Ecclesiasticæ Causæ sunt, quæ aut agunt de Personis Ecclesiasticis, aut de rebus. Res tales sunt partim divinæ, utpote Res sacræ & religiosæ: partim Prophanæ, quæ etiam dicuntur Res temporales, cujusmodi sunt Decimæ *t. t. X. de decim. & in 6. jus Patronatus cap. 3. X. de jud. & t. t. X. & in Clem. de jure Patron.* omniaque bona Ecclesiæ, ex quibus ipsa suos habet redditus ac proventus. Respectu personarum Causæ Ecclesiasticæ dicuntur, Electiones, Postulationes, Provisiones, Ordines, dignitates, officia, Canonicatus, quibus etiam jure Pontificio & Consuetudinario annumerari solet Causa matrimonialis *cap. 13. & 28. X. de sponsal.* Carpzov. *Jurispr. Consistor. lib. 3. tit. 1. Def. 2. num. 15.* quando scil.

D

quæ-

quæstio vertitur de ipsa matrimonii substantiâ, sive matrimonii fœdere, uti loquitur Anton. Faber. *in Cod. lib. 3. tit. 7. Def. 16. n. 1.* Incidunt etiam quandoque causæ ob crimina, quæ merè perhibentur Ecclesiasticæ, qualis est Hæresis, unde illius cognitio de jure præprimis Canonico ad solos judices Ecclesiasticos spectat Jul. Clar. *lib. 5. recept. sent. §. Hæresis, vers. Hoc crimen.* Et quanquam de Jure Canon. Judex Ecclesiasticus solus de hisce criminibus cognoscat, tamen non ipse condemnat ad pœnam ignis, sed tantummodo declarat reum esse hæreticum & remittit judici seculari puniendum, prout in practica observari attestatur Clar. *d. versic. & vers. Scias tamen.* Non enim jura permittunt, ut Ecclesiasticæ Personæ intersint judiciis criminalibus, in quibus de puniendo maleficio, pœnarumque sanguinis irrogatione agitur, *cap. 5. & cap. 9. pr. X. ne Cler. l. Monac.* Merè Causæ seculares sunt, quæ nullo modo ad Ecclesiæ judicium pertinent, possunt tamen esse haut minus inter personas Ecclesiasticas, quàm seculares. Causæ Mixtæ, de quibus cognoscendi & statuendi jus habet tam Laicus judex, quàm Ecclesiasticus, ideoque à Doctoribus dicuntur Causæ fori mixti. Sic hodiè fori mixti est (1) controversia de usuris *l. 1. X. de Usur. Rec. Imp. de anno 1530. tit. 26. §. Diewel aber.* Carpz. *d. Def. n. 16.* Reinking. *de Regim. sec. & Eccl. lib. 3. class. 1. cap. 10. num. 63.* Jul. Clar. *lib. 5. recept. sent. §. fin. quæst. 37. vers. Quæro igitur.* (2) Adulterii quæstio, ut multis probat Alciatus *in cap. un. n. 18. X. de Off. Ordin.* quod ita demum verum est, si ad adulterium perpetratum agatur ad pœnam corpori infligendam, non item si agatur ad pœnam thori. Quippe quod ad hunc effectum causa Adulterii est mera Ecclesiastica. Clar. *d. quæst. 37. vers. quæro numquid* (3) mixti fori est Concubinatus. *Id. vers. quæro abiam.*

§. II.

Sicut itaque de causis, quæ merè sunt Ecclesiasticæ, judex laicus sive secularis jus dicere sive judicare non potest, quoniam illarum cognitio ad Ecclesiasticum spectat. *cap. 2. & 3. X. de judic. cap. 3. X. de Ord. cognit. Auth. Causa & Auth. Statuimus C. de Episcopis & Cler.* ita quoque nec tales ab Ecclesiastico avocare, minimè competit. Et quemadmodum in Ecclesiasticis meris Ecclesiasticus non secularis judex esse potest, ita vice versà in secularib. meris soli seculares sunt judices, sacerdotesque sive clerici in his judices esse prohibentur. *t. 1. X. Ne Cler. vel Monach. secul. negot. se immisc. l. 23. C. de Testam.* ideoque & in hisce avocatio soli secularis Jurisdictionis superiori competit. Hodie tamen cum illa Ecclesiastica Jurisdictio in Imperii Principes Augustanæ Confessioni addictos sit quoque translata, ita ut utramque & Politicam & Ecclesiasticam in suis Consistoriis per idoneos & occurrentium rerum peritos. B. Sinold *cogn. Schulz. Vol. 2. Coll. Publ. Diss. 2. th. 4. lit. c.* exercent Potestatem. Magnif. Dn. PRÆSES, *Exot. ad A. B. 7. n. 25.* ita quoque causas coram Consistoriis pendentes Principes avocare haut prohibentur. *Carpz. Jurispr. Consistor. lib. 3. tit. 1. Def. 14.* quod avocandi jus Serenissimus Sax. Elector disertis sibi reservavit verbis in *Ordin. Eccl. tit. von beyden Consistoriis cap. 13. §. Doch behalten wir uns.*

§. III.

In Causis verò, quæ sunt fori mixti, tam judex Clericus, quam Laicus adiri potest; Ad quem autem primum causa est delata, is judex permanere debet, ita ut hoc casu Jurisdictionis præventioni locus sit. *Jul. Clar. lib. 5. recep. sent. §. fin. quest. 37. vers. Ulterius quæro.* Si itaque per præventionem secularis judicis Jurisdictio est

præoccupata, causa coram iudice seculari pendens avocari non potest, & vice versa, quoniam per præventionem alterius Jurisdictio est exclusa.

§. IV.

Sed quid de causis criminalibus pœnam corporis afflictivam habentibus statuendum, an in iis etiam Avocatio locum invenit? De jure Civili iudicem habitationis vel originis iudici reum avocanti remittere debere, expeditum est l. 7. §. 5. ff. de Accus. l. 22. ff. eod. l. 28. §. 15. ff. de pœn. l. 7. ff. de custod. & exhib. reor. l. 3. pr. ff. de remissio. l. 1. C. de exhibend. & transmitt. reis. Nov. 69. cap. 1. §. 1. & Novell. 134. cap. 5. Harprecht. ad §. 5. l. de Oblig. qua ex del. nasc. n. 84. Ratio est, quoniam certiores probationes iudex in loco delicti habere potest, quàm in loco domicilii per d. Novell. 69. cap. 1. §. 1. vel, ut deterreantur alii ab iisdem facinoribus, & solatio sit cognatis & affinibus interemtorum, si in eorum conspectu vindicta de fontibus sumatur, ut loquitur d. l. 28. §. 15. ff. de pœnis. Hodiè tamen ista remissio in consuetudinem abiit, ut cum Baldo & aliis norant Covarruv. Pr. Quæst. cap. 11. num. 10. Carpz. Prax. Crim. part. 3. quæst. 110. n. 53. In Italia enim in qualibet civitate Jurisdictionem separatam habente, quilibet delinquens à remissione est securus, uti testatur Jul. Clar. lib. 5. sentent. recept. §. fin. quæst. 38. vers. Sea certè. Id quod etiam de consuetudine Regni Gallie idem comprobatur. Idem quoque in Flandria & aliis locis observari confirmatur. Didac. Covarr. dict. quæst. pr. cap. 11. n. 10. In Imperio quoque Romano-Germanico inter Imperii Principes & Status, eorundemque subditos ejusmodi remissiones hodiernis moribus haut frequentari, tradunt Gail. lib. 1. de pace publ. cap. 16. n. 30. Carpz. dict. quæst. 110. n. 56. Et quanquam, uti diximus, remissiones criminoso-

rum

rum Germaniæ mores non admittant ; attamen in delictis gravioribus propter exemplum ad locum delicti precariò & jure amicitiae & vicinitatis ex urbanitate, ut loquitur Carpz. *d. quest. n. 57.* remissio fieri solet ; idque sub antigrapho, sive literis (uti à Dd. vocantur) reversalibus ipsius Magistratus aut Domini remissionem petentis, auf einen Revers und Gegenbefändniß / quibus cavere debet, se per remissionem talem, quam non jure, sed precibus obtinuit, nihil jurisdictioni vel superioritati ipsorum remittentium derogatum iri, seque in casu simili idem facturum esse Gail. *d. lib. cap. 6. n. 31.* Berlich. *Concl. Pract. part. 5. Concl. 45. n. 46. & seqq.* Carpzov. *d. quest. 110. n. 59.* Harprecht. *ad d. §. 5. l. de Obl. qua ex del. nasc. num. 85.*

§. V.

Hæc de remissione dicta intelligenda sunt de eo casu, quando judex remissionem petens, & judex, à quo delinquens captivus tenetur, sint ejusdem dignitatis, vel is qui remissionem postulat, sit inferior hoc judice. Par enim in parem potestatem non habet, & multo minus inferior in superiorem *l. 3. & 4. ff. de Recept. arb. l. 14. ff. de Jurisd.* perindeque talem remissionem per avocationem postulare nequeunt. Quam tamen omninò efflagitare possunt Principes à judicibus Principatui subjectis atque ab ipsis constitutis. Carpz. *d. quest. 110. n. 61.* e. g. Si crimine in Præfectura quadam commisso, delinquens in ditionibus Nobilium, Civitatum, aliorumque judicum Electoratus Saxon. subjectorum deprehendatur, dubium prorsus est nullum, quin judices inferiores, secundum Ordinationem Provinciale à cit. Carpzov. allegatam, reum ad locum delicti, Serenissimo Domino Electore postulante, remittere teneantur. Et huc usque de eo

casu, quando reus extra locum delicti invenitur. Quando autem reus in loco delicti fuit captus, non facile absque pręgnanti causa remissio conceditur. Et quamquam iudices suspecti accusentur, attamen nec tali casu reum solent remittere, sed superior iudex debet aliis causam illam committere, qui iudicent. Nam si delinquentes aliõ ducerentur, facillimo negotio possunt evadere. vid. *Reb. tr. de Evoc. art. 2. n. 27.* id quod etiam expressa Constitutione in Regno Gallię est provisum, in verbis: Et quant aux malheures criminelles &c. Constitut. illam vid. *ap. Cit. Rev. dict. loc.*

§. VI.

De Statibus Imperii quæritur, an si illi delicti impunitatem reo indulgerent, quod delictum esset contra Legem divinam moralem, ut est dolosum homicidium, latrocinium, an non Imperator possit talem causam criminalem ad suum trahere tribunal? Et quamvis Imperii Principes pœnam legibus præstitutam ex concessione Imperatoris *R. J. de anno 1523. §. Es soll sich auch ic. & longi temporis præscriptione delinquenti remittere possint;* attamen si prorsus scelerum veniam dent, non obstante tali indultu concludendum esse existimamus, Imperatorem talem causam avocare, delinquentemque punire posse. Ad curam enim supremi principis, tanquam Imperii capitis, spectat, ne iustitia in suis provinciis negligatur, & contra jus divinum delicta impunita maneat. Unde etiam omnes Status Imperii DEO & Imperatori tenentur administrationis suę rationem reddere *R. N. zu Spener de anno 1529. §. Und nachdem etc. in verb.* Wie solches ein ieder gegen GOTT und seine Majestät gedencken zu verantworten. Et aliàs etiam propter denegatam & neglectam iusticiam causa omnis ad

ad Imperatorem devolvitur. Imò expresse constitutum est, Imperatorem posse animadvertere in Status Imperii, si jus aut justitiam negligent, aut delicta impunita relinquant. R. M. zu Augsburg. de anno 1530. in *Reform. Polit. sub tit. von Gottes Råsterung. s. Würde aber eines Fürsten/Grafen. 4.*

§. VII.

Ad Avocationem autem Causæ Magistratus tam Ecclesiasticus, quàm secularis non nisi ex causa eaque justâ proclivis esse debet. Vultej. *ad l. 1. C. de Jurisd. omn. jud. n. 173.* tendit enim ad turbationem justî ordinis, ad litigantium captionem, & denique ad quandam contumeliam judicium. Mevius *Part. 2. Dec. 134. n. 12.* ideoque, ut res odiosa restringenda *arg. l. 19. ff. de lib. & postb. hered. instit. & cap. 15. de R. J. in 6.* Et quanquam summo Principi vel cuivis Magistratui superiori non sit imposita certa quædam lex, quæ illum tenet obstrictum, certas observare Avocationis Regulas; sed in illius liberrimo positum est arbitriò, causas quascunque & quando velit avocare. Attamen de honestate non debet causas quaslibet sine causa justâ avocare, ne scil. instar pueri sit, qui jam dat moxque iterum aufert. Rebuff. *d. tr. de Evocat. quest. 6. num. 59.* Causæ itaque judicem ad Avocationem moventes debent esse rationabiles. Quales sunt Publica utilitas, Causæ gravitas, personarum favor, judicis inferioris vel suspicio, vel negligentia, vel sævitia, nec non Causæ continentia & similes de quibus omnibus in sequentibus.

§. VIII.

I. Justa atque legitima causa dicitur Publica utilitas Mynsing *Dec. 3 Resp. 21. n. 72.* quæ cum cuivis privati privilegio sit præferenda *l. 10. C. de SS. Eccles.* meritò etiam Prin-

Principes sive Magistratus superiores illas causas, quæ faciunt ad Reip. salutem & tranquillitatem, ab inferiori iudice ad suum trahere tribunal haut prohibentur. Propter hoc enim, quod in commune utile est, concedi debet avocatio. Rebuff. *d. tr. de Evocat. quest. 6. n. 57.* Hinc non immerito in Imperio nostro Judicium Aulicum vel Camera Imperialis nullo obstante privilegio, nullâ declinatoriâ fori exceptione in iis causis, quæ videntur turbare Reipubl. tranquillitatem, jus avocandi habet. Inter tales autem principem tenet locum religiosa pacis publicæ violatio, quâ Ecclesiæ atque Imperii salus turbatur, cujusque constitutio magno labore summaque diligentia ab Imperatoribus est acquisita. Reichs Absch. zu Augspurg *de anno 1566. §. Wiervol wir nun 16. 3.* Consentaneum utique fuit vitum, summis Imperii tribunalibus in causis Religionem concernentibus tantummodo competere Jurisdictionem. *R. J. de anno 1555. §. Wir befehlen 32. vid. quoque Ord. Judic. Aul. Ferdin. III. tit. 1. vers. Wir wollen auch unter in med.* Fit autem ejusmodi pacis violatio, quando status Imperii contra alium Religionis intuitu in persona, vel rebus, veluti in perceptione reddituum perturbatur. Gail *1. Obs. 2. n. 1.* perindeque est, si ve quis ipse in persona, si ve per alterum mandando, vel factum ejus ratificando, turbaverit. *R. J. de anno 1555. §. Und damit solcher Friede 15.* Qui enim per alium facit, ipse fecisse censetur *l. 1. §. 12. ff. de vi & vi armata l. 169. ff. de R. J. & ratihabitio mandato æquiparatur. l. 152. §. 2. ff. de R. J.* Nullum igitur Privilegium, nullaque dignitatis aut cujuscunque excellentiæ prærogativa illius pacis violatores à Jurisdictione Cæsaris vel Cameræ Imperialis eximere potest. *Ordin. Cam. part. 2. tit. 10. §. So iemands hohen 1.* Et idcirco, si causa talis coram iudiciis pri-

privilegiatis, putà Austregis, fuerit incepta, Judicium Aulicum Cæsareum vel Camera Imperialis illam ipsam potest, ut ab incompetentibus, avocare, præsertim quando ad poenam Banni agitur. *Roding. Pand. Camer. tit. 6. §. 8.* Et quemadmodum in casu violatæ pacis Religiosæ in prima instantia Imperatoris atque Cameræ fundata est Jurisdictio, sic quoque nec pacem profanam turbantes Cameræ atque Imperatoris forum ullo fori privilegio declinare possunt. *d. §. 1. Ord. Cam.*

§. IX.

II. Cum magnæ & arduæ causæ magnos requirant judices. *l. 32. §. 7. ff. de recept. qui arb.* Hinc Jethro, cum Mosi genero suo consulisset, ut judices eligeret, quibus causarum definitionem committeret, hanc adjecit clausulam, ut si quid majus accidat & gravius, referant ad ipsum. *Exod. 18. v. 22.* non itaque absque jure & ratione judicibus superioribus ejusmodi causas coram inferiore, judice intentatas datur avocandi licentia. *Damhoud. Prax. rer. civ. cap. 193. n. 1.* Dicuntur autem aliàs à Doctoribus magnæ causæ vel propter causæ arduitatem, vel ipsius magnitudinem sive præjudicium, ut loquitur Rosacorb. *Obs. Pract. for. cap. 73. n. 9.* quando scil. de omnibus bonis, vel de plurima bonorum parte est controversia *l. 21. pr. ff. de Excus.* vel quando movetur quæstio status. *d. l. 32. §. 7. ff. de recept. qui arb.* Rectius tamen in materia Avocationis Avocantis relinquitur arbitrio judicare de causis juxta rerum & personarum qualitatem, an illius gravitas digna sit, ut ab inferiori judice avocetur. *Menoch. lib. 2. cent. 1. Cas. 72. n. 10.* Et licet aliàs supremum in Imperio nostro sit judicium Camera Imperialis, concurrentemque cum judicio Aulico habeat Jurisdictionem, attamen quando quæstio sive controversia ori-

tur inter Vasallos Imperii immediatos, non potest sese Camera intromittere in istis causis, uti gravioribus, & magni momenti, cujus cognitionem Imperator sibi soli reservavit. *vid. Ordin. Cam. part. 2. tit. 7.* Si itaque Status Imperii coram Camera judicio comparerent, inque illius jurisdictionem consentirent, vel si etiam in arbitros compromitterent, ex illo tamen consensu, non prorogatur Jurisdictio in præjudicium Imperatoris, sed causa coram Camera vel arbitris cœpta Imperator potest avocare, & per rescriptum inhibere, ne ulterius procedatur; Reinking. *de Regim. sec. 8. Eccl. lib. 1. class. 4. cap. 19. num. ult.*

§. X.

III. Ex saluberrimâ quoque Imp. Constantini Constitutione, quæ habetur *in l. un. C. quand. Imp. inter pup. vel vid. vel alias miser. pers. cognosc.* non incongruè potest elici justa Avocationis causa, ubi nempe sic reperitur dispositum: Quod si pupilli, vel viduæ, aliiq̃ue fortunæ injuriâ miserabiles judicium Serenitatis Imperatoriæ oraverint, præsertim cum alicujus potentiam perhorrescunt, cogantur eorum adversarii examini Imperatorio sui copiam facere. Cumq̃ue hoc in peculiare privilegium concedatur, in favorem pupillorum, viduarum, aliarumq̃ue miserabilium personarum, quod ad illarum Instantias, Imperator causas ad alterius judicium pertinentes, ad suum potest trahere tribunal, examiniq̃ue suo subicere. Modest. Pistor. *Consul. 30. Vol. 1. num. 3.* Non tantum autem hæc Constitutio habet locum in primâ Instantia, ante litis pendentiam, sed maximè quoq̃ue procedit, quando apud inferiorem judicem in causa illa jam nunc cœptum est judicium, sive Actoris sive Rei partes personæ istæ sustineant. Joan del Castillo *lib. 3. quot. contr.*

cap.

cap. 25. Hoc enim privilegium propter misericordiam est datum, ideoque illi per factam litis pendentiam valdè renunciari nequeunt, per Regulam hanc apud Doctores valdè frequentatam: Quandocunque alicui aliquod datum fuerit privilegium propter misericordiam, videtur magis dantis causa, quàm ejus, cui datur, concessum ut cum Gloss. annotat Sichard. *ad d. l. un. C. qn. Imp. inter pup. l. vid. n. f.* Et quanquam hodiernis moribus, hoc privilegium, quod ad personam Imperatoris haut inveniat locum, quippe qui conventioni de cognitione omnium causarum, tam miserabilium, quàm aliarum personarum, cum Statibus Imperii inita stare obligatus est: Hinc quoque in Camera omisso medio Statuum judice in causa viduarum & pupillorum, nisi in casu denegatæ vel protractæ justitiæ, non decernuntur Processus, uti Constitutionum Imperii optimus interpres, Imperialisque Cameræ praxeos & styli diligentissimus observator. Gail. *lib. 1. Obs. 1. n. 40. vers. Sed hoc etiam*, observat. Attamen, nihil est, quod Status Imperii, qui Imperatoris jura in suis territoriis tenent, impedire possit, quò minus Constantini Imperatoris constitutionem practicare, personarumque miserabilium causas ab inferioribus judicibus ad suum tribunal vocare queant. Brunn. *ad l. un. C. qn. Imp. inter pup. n. 15.* si modo illa avocatio fiat cum moderamine, ut rectè monet Anton. Thesaur. *Decis. Pedemont. 177. n. 10. & seqq.* & Treutl. *vol. 1. Disp. 3. tb. 10. lit. f.* Quinam aurem nomine Pupillorum, viduarum & personarum miserabilium veniant, de iis consulendi sunt. Sichard. *sub rubr. d. t. C. qn. Imp.* Joan del Castill. *lib. 3. contr. quot. cap. 25. per tot.* Carpz. *lib. 2. Resp. 19. n. 15.* Menoch. *de Arbitr. jud. lib. 2. cent. 1. Cas. 66.* Thom. Aëtius. *tr. de infirm. ejusq. privil. cap. 13. num. 5.* Brunnem. *ad d. l. un. n. 1. & seqq.*

§. XI.

IV. Quoniam etiam ex juris provisione absque omni suspitione judicia procedere debent *c. 15. l. Caus. III. qu. 5. l. 16. C. de jud.* & ideo litigatoribus fas est, si velint & iusta suspitionis causa ipsis suppetat, iudicem competentem & habilem ut suspectum recusare *l. 16. C. de jud. l. 17. ff. eod.* quæ recusatio est in naturali æquitate fundata *cap. 41. in f. X. de Appellat.* iustamque suppeditat superiori iudici avocandi causam. *Fab. lib. 3. Def. 1. & Def. 9. pr. Carpz. Proc. Jud. tit. 3. art. 4. n. 99.* Deficiens quippe vel impedita Jurisdictio inferioris locum facit superiori, cujus est defectus inferioris supplere. *Mæv. part. 2. Def. 215. n. 3.* Iriusquam autem partes suspicionem allegantes Avocationem impetrant, necesse est, ut illam ipsam probent *c. 41. X. de Appell. cap. 39. & cap. 27. §. Eum verò. X. de Off. & potest. del. Bernh. Grav. Concl. Pract. Cam. Concl. 33. Confid. 4. n. 2.* Deficientibus autem aliis probationibus rectè eam per iuramentum à superiore recusanti delatum probari posse, tradit Mascard. & illam opinionem communiter receptam esse, dicit *Vol. 2. Concl. 952. n. 1. & 3.* Causæ autem, ob quas iudex potest recusari, multæ ac variæ sunt, nec in iure certò definitæ, iudicisquæ avocantis arbitrio æstimandæ, iustæne sint, an iniustæ, & idcirco recusatus à causæ cognitione removendus sit, nec ne. Ejusmodi causas iustas removendi quinquaginta enumerat *Contr. Lancilott. tr. de Off. Prat. in Caus. civil. Tit. de Except. n. 11.*

§. XII.

V. Ad iudicis superioris quoque officium spectat, lites diminuire *l. 21 ff. de reb. cred.* controversiasque dirimere *l. 1. §. 10. ff. de oper. nov. nuntiat.* qui autem iusticiam petenti denegat vel protrahit, nunquam officio suo benè fungitur, sed potestate sibi concredita potius abutitur, ideoque

ideoq; præter pœnam, quam DEO Opt. M. tandem exsol-
vet gravissimam *Deut. 27. v. 3.* & hoc demeretur, quòd
quoad illam causam, in qua justitiam administrare dene-
gavit, jurisdictionem amittat, superiorque pro admini-
stranda justitia adiri queat, ut causam à judice inferiore
avocet, & processus cursum coram inferioris judicio in-
choatum coram se continuare permittat. *Carpz. Proc. jud.
tit. 3. art. 4. n. 98.* Et licet aliàs superior non possit avoca-
re causas ab inferiore, qui ordinariam habet Jurisdic-
tionem, ex causa tamen denegatæ justitiæ amittit inferior
suam jurisdictionem quoad illam causam, ita ut teneatur
reus se sistere coram superiore. *Mæv. ad Jus Lub. lib. 5. tit.
3. art. 4. n. 25.* licet inferiores etiam privilegio de Non-
appellando sint muniti. Privilegium etenim tale in ju-
stitiæ administrationem illis est concessum, semperque
illam ipsam præsupponit. Credidit enim Imperator,
eos, qui ob singularem industriam, exploratâ eorum fi-
de & gravitate, ad hujus officii magnitudinem adhiben-
tur, non aliter judicaturos esse, pro sapientia ac luce di-
gnitatis suæ, quam ipse foret judicatuus, uti loquitur
Aurelius Arcadius Charisius *l. un. §. 1. ff. de Off. Praef. Pras.*
Si itaque justitia querulantibus denegetur, cessabit utique
ejusmodi privilegium, nec ad casum hunc insolitum &
non expressum est extendendum. *Carpz. de Priv. Duc. Sax.
cap. 6. n. 26.* Unde quoque Aureæ Bullæ sanctio, qua Im-
perii Electoribus privilegium de non Appellando con-
ceditur, casum denegatæ justitiæ disertis verbis excipit:
In defectu verò, inquit, justitiæ prædictis omnibus ad Im-
perialem duntaxat curiam & tribunal sive judicis imme-
diatè in Imperiali curiâ pro tempore præsidentis audien-
tiam &c. licet appellare. *A. B. cap. 11. §. 2. vid. qq. Ordin.
Cam. part. 2. tit. 1. §. 1.* Et quamvis etiam haut concedatur

avocatio, quando causæ cognitio inferiori ex investitura competat, *supra* §. 8. *tit. 2.* attamen propter denegatam justitiam judex feudalís non minus, quam alius in causâ ista Jurisdictionem amittit. Rosenthal. *de feud. cap. 10. Concl. 26. n. 43.* & Vassallus recursum ad superiorem habet. Magnif. Dn. Struv. *Synt. Jur. Feud. cap. 16. sb. 11. n. 11.* Mynsing. *Dec. 3. Resp. 22. n. 2.*

§. XIII.

Fit autem Justitiæ denegatio, vel simpliciter, vel per protractionem, quæ distinctio observatur in Ordinat. Cam. *part. 2. tit. 1. §. 1. & tit. 28. pr.* his verbis: *Daß einem zu Recht nicht verholffen/ oder ihn das kündlich versaget/ oder mit Gefährden verzogen wäre.* Simpliciter denegatur Justitia, si judex supplicantis preces planè audire nolit, sed eum limen judicii adeuntem, vel litis progressum prosequentem apertè repellat. Protrahitur verò, si judex causam intra præfixum tempus non finiat, sed se negligentem in cognoscendo, vel exequendo præbeat. Blum. *Proc. Cam. tit. 37. sb. 2.* In utroque casu Avocatio, quæ magno cum Præjudicio Inferioris judicis est conjuncta, non præcipitanter, nec sine circumspectione est decernenda, sed requiritur 1. Justitia à judice legitimè & decenter requisito apertè sit denegata. *Daß das Recht kündlich versaget oder verzogen.* vid. Ord. Cam. *tit. 28. pr.* Quamdiu itaque judex non est requisitus, nihil ei imputari, nec justitiam denegasse dici potest B. Sinold. *cogn. Schuß Colleg. Publ. vol. 2. Diss. 8.* & non aliter judex negligens & officii sui desertor dici potest, quam si requisitus fuerit. Jalon. *in l. un. C. de prec. Imp. off. num. 4.* In privatis quippe negotiis nemini officium suum, nisi peticum impertiri tenetur. *l. 4. §. 8. ff. de damn. infect.* Id quod verò allegare, non
suf-

sufficit, sed tenetur prius supplicans de facta justitiæ administrandæ requisitione, & subsecuta ejus denegatione publico fide digno documento docere. *Mynsing. cent. 3. obs. 57. Rosenthal. de Feudis cap. 12. num. 64.* ubi etiam formulam instrumenti factæ requisitionis tradidit. Non enim in judice negligentia præsumitur, nisi legitima probata sit requisitio. *l. 2. C. de off. civ. jud. Nov. 17. cap. 3. Blum. Proc. Cam. tit. 27. tb. 8.* Quod si verò requisitio & denegatio notoria sit, allegare eam sufficit, notorium enim pro probato habetur, nec probatione indiget. *cap. 9. X. de Accus. Gail. 2. Obs. 31. num. 17. & 18. Mynsing. cent. 6. Obs. 3. n. 11. Hartm. Hartm. cap. 1. miscell. Obs. 6. n. 3.* Sed quid si provocans per juramentum velit probare, se non sperare, quod secuturus sit justitiam, an ob talem juramentum assertionem avocatio sit concedenda? Id quod affirmat *Mynsing. cent. 3. Obs. 54.* cum hac limitatione, nisi is, qui jurare velit, antea perjurium commiserit. Contrarium tamen statuit post Felinum *Gailius lib. 1. Obs. 28. n. 3. Berlich. r. Concl. 3. n. 4.* A jure enim & ratione alienum est, ut juramentum causâ non cognitâ in alterius recipiatur præjudicium. *Mævius part. 2. Dec. 54. n. 9.* præsertim, etiam, cum alio remedio ei consultum sit, ideoque juramentum in judicis contumeliam extra judiciorum solitum ordinem permitti non debet. *l. 16. pr. ff. de Minor. 2.* Ut ad Avocationem, in casu denegatæ justitiæ descendat judex superior, requiritur, ut tempus ad justitiæ administrationem inferiori præscriptum sit elapsum. Solet enim judex superior inferiorem per literas, quas vocare solent Promotoriales in casu, quo quis denegationem justitiæ evidenter probare haut potuit, vel ubi tantum protracta est justitiæ administratio, præmonere, intra certum tempus justitiam ut administret. *Ord. Cam. d. t. 28. f. Damhoud.*

houde. prax. rer. civ. cap 193. n. 3. Si itaque à superiore ejusmodi literæ emanarint, justitiæque haut fuerit satisfactum, ulteriori requisitione prætermisâ ac nullo desuper prolato justitiæ denegatæ documento iudex superior avocare haut prohibetur. *Ord. Cam. part. 2. tit. 28. §. Nach dem 1. junct. Deput. Abschied zu Speyer. de anno 1600.* Ob auch promotoriales 27. Römcl. *ad A. B. part. 2. Diff. 2. tb. 13. lib. 6.* 3. Sicut appellatio fit ab inferiore ad superiorem in proximo gradu *l. 21. pr. & §. 1. ff. de Appell.* ita etiam ut causa per avocationem devolvatur, requiritur, ut iudex justitiam denegans vel protrahens, ita immediatè sit subjectus, ut nullus inter judicem à quo & judicem avocantem intermedius sit. B. Sinold. *cogn. Schuß. Coll. Publ. vol. 2. Disp. 8. tb. 11. lit. a.*

§. XIV.

V. Est quoque Principis ac supremi Magistratus providere, ne alicui subditorum fiat violentia, neque minus potentes à potentioribus opprimantur *l. 6. pr. & §. 2. ff. de Offic. Præsid.* ubi Bald. *in fin.* admonet: Judices magnam facere Eleemosynam apud DEUM, quando tuentur pauperes, ne opprimantur. Et hoc ipsum omnium Superiorum supremus præcepit Iudex *Esai. 1. vers. 17.* Quærite, inquit, iudicium, & subvenite oppresso & *Jerem. XXII. vers. 3.* Facite iudicium & justitiam, liberate vi oppressum à manu calumniatoris. Id quod etiam Imperatoris & Regis proprium perhibetur esse officium. *can. 23. XXIII. qu. 5.* Justam itaque præbet superiori avocandi causam, si subditi seu partes litigantes nimia crudelitate ab inferiore graventur. Borell. *in summ. Decis. tom. 2. tit. 27. num. 26.* Quemadmodum enim propter nimiam crudelitatem & sævitiam commissam potest in totum auferri Jurisdictio, ita ut subditi à Dominorum jurisdictione

atione eximantur nec ab eo revocari atque repeti queant
Mynsing. cent. 5. Obs. 8. n. 5. Gail. lib. 1. Obs. 17. n. 2. & 4.
 Quidni etiam causam quandam avocare? Judicis enim
 superioris est defectus & excessus inferiorum judicum
 corrigere. Hinc ob nimiam asperitatem gravati statim
 pro remedio ab inferiore ad superiorem confugere va-
 lent, implorando ejus officium, ut causam avocet, judi-
 cisque puniat sævitiam. Id quod non procedere tan-
 tum in judicibus delegatis, sed etiã in ordinariis manife-
 stum est. Siquidem Imperator, sive Camera Imperialis
 in casu tali, quo Status Imperii in subditos nimium sæ-
 viunt, solet Mandatis S. C. procedere. *Blum. Proc. Cam. tit.*
34. tit. 78. Et licet omnis sævitia, quæ sit ex quovis erga
 rusticos rigore, haut sit sufficiens ad adimendum rei
 usum vel fructum, cum extra delictum pœna haut sit sta-
 ruenda *Rol. à Vall. Consil. 18. n. 39. Vol. 3.* sed tantummo-
 do immodica sævitia cum facto omni jure prohibito con-
 juncta privationis & expulsionis causam suppeditat. *Gail.*
d. obs. 17. n. 4. attamen omnis jurisdictionis in partes exces-
 sus vel abusus causam avocandi non injustam præbet.

§. XV.

IV. Justam quoque avocandi causam suppeditat
 Causæ continentia, sive connexitas, quæ est inter eas cau-
 sas, quarum una absque altera rectè tractari non potest.
Sichard. in l. 1. C. de Transact. n. 3. putà, si apud superio-
 rem judicem alia lis tractetur inter easdem personas, cu-
 jus tanta sit cum ea, quæ coram inferiore pendet, connexi-
 tas, ut sententia, quam in una lite continget, paritura sit
 exceptionem rei judicatæ in alia, aut ut rerum judican-
 darum contrarietas timeri possit. *Faber. lib. 3. Cod. tit. 1.*
Def. 1. Vel, si causæ sint tales, ut ex earum noticia depen-
 deat, alius Processus coram judice inferiore productus,

ita, ut hic Processus gravior sine certa cognitione alterius non satis dignè ac debite peragi possit, & alter ab altero totus dependeat. Damhoud. *Prax. rer. civ. cap. 193. n. 5.* Ratio istiusmodi avocationis sita est in Regula in scholis & foro usitatissima, quod causæ continentia haut sit dividenda. *cap. 43. X. de Rescript. l. 10. C. de jud. §. 1. ff. de quib. reb. ad eund. jud. eat.* Cujus Regulæ ratio est, ne quis in diversis judiciis de re eadem litigare cogatur, ac proinde cum temporis & sumtuum dispendio in diversos judices distrahatur; quod ne fiat, non privatim duntaxat ipsorum litigantium, ne partes nimis sumtibus onerentur; sed etiam Reipubl. interest, quo lites, quæ ad Principatuum Comitatumque dissipationes & ruinas irreparabiles sæpenumero existunt occasiones, abbrevientur & contrahantur. *l. 4. §. 1. ff. de alien. jud. mut. caus. l. 21. in f. de reb. creditis l. 13. pr. C. de judic. Novell. 18. cap. 8.* Hinc est, quod reus immediatè Imperio subjectus cum alio immediato in Camera rectè conveniatur. Mynsing. *7. Obs. 4.* Dividitur autem Continentia, si coram singulis iudicibus, quorum aliàs est Jurisdictio, singulæ actiones instituuntur. e.g. Si ex bonis creditori in hypothecam datis quædam in Electoris Palatinì, quædam in Moguntini Electoris, quædam in civitatis Francofurtensis Jurisdictione sita sunt, & creditor pignoris & hypothecæ velit convenire de rebus in Palatinatu. sitis coram Electore Palatino, de rebus verò in Moguntini Electoris districtu & civitate Francofurtensi sitis, coram Electore Moguntino & Francofurtensi Magistratu, tum enim actio, quæ est unica, in tria diversa judicia deducetur, & actio seu causa, quæ est connexa, dividetur. Ne itaque hoc fiat, & actor diversis judiciorum instantiis fatigetur jure cautum est, ut omnium & quidem proximè superior judex ad-

adiri queat, qui de causis cognoscat, illasque dirimat. B. Dn. Sinold. cogn. *Schurz Colleg. Publ. Vol. 2. Disp. 6. tb. 30. lit. c.* Magn. Dn. Struv. *Syntagm. Jur. Civ. Exerc. 5. tb. 56. num. 1.* Cum itaque in casu allegato nominatorum omnium Superior est Camera Imperialis, idèò judicibus inferioribus prateritis illa sola adiri potest. *Deputat. Abschied de anno 1600. §. Bey unserm Kayserslichen Cammer-Gericht. 23. & seqq. Mynsing cent. 1. obs. 4. & obs. 97. Gail. lib. 1. obs. 32.* Ista autem continentia consideratur vel ratione generalis actionis, ut tutela, negotiorum gestorum. *Gail. 1. obs. 32. n. 5. vel ratione rei petita t. t. ff. de quib. reb. ad eund. jud. vel ratione Contractus aut delicti t. t. ff. de duob. reis. & modis passim aliis, de qua materia, ne Iliada post Homèrum scribere videar, ad Gail. d. Obs. 32. Brunnem. ad l. 10. C. de jud. num. 2. seqq. Blum. Proc. Cam. tit. 40. num. 3. & alios passim me remissum volo.* Illud tantummodo ratione Continentiæ hæc vice observandum est, quod iudex superior non ad nuda narrata avocationem concedere soleat, sed continentia talis prius probetur necesse est; quæ non benè exploratâ, examinatâ verâque deprehensâ, superior ad Avocationem decurrere non debet. In dubio enim ab Avocationibus abstinendum. *Lancell. de Attent. cap. 10. num. 40. cum odiosa sit. Fab. lib. 3. tit. 1. Def. 1. num. 2. nisi itaque Continentia vera atque nota sit, non datur Avocatio. Mavius part. 2. Def. 135. per tot.*

§. XVI.

Et hæ sunt Causæ, quæ Magistratum superiorem possunt commovere, ut causas coram inferioribus pendentes avocet. Non autem hæ causæ recensitæ certos constituunt limites, certamq; præscribunt legem, ac si ultra nominatas causas Princeps avocationem mandare nō

possit. Hoc enim esset supremæ potestati, in qua omnis jurisdictio plenaria est radicata *Bend. tr. de Rev. Concl. 23. num. 32.* & ab illius voluntate atque arbitrio omnis dependeat inferioris Jurisdictio, limites ponere nimis angustos. Omnes tamen ad certum revocare numerum, impossibile esse putamus, cum ratione summæ potestatis, quam tenet in Jurisdictione, pro liberrima sua voluntate quascunque causas ad suam potest trahere cognitionem, nisi ei lex seu constitutio fundamentalis vel pactum cum inferioribus initum, uti ex antec. cap. notum est, obstabit. Solet tamen quoque Princeps interdum in ordinariæ Jurisdictionis concessione, vel liberum in cognoscendis causis sibi reservare arbitrium, vel etiam in certis tantummodò causis: Sic de Comitibus Flandriæ refert *Damhoud. prax. civ. cap. 193. num. 6.* quod ille per Instructionem Camera sibi reservaverit, omnium extraneorum mercatorum, omniumque exterorum, cujuscunque sint dignitatis causarum Avocationem. Et hæc de Causarum enumeratione sufficiant. Nunc propterandum ad

CAPUT IV.

De

Causa Formali.

§. I.

CUM Forma rei tribuat suum esse, conservetque eam in esse, unde digressio de una forma in aliam dicitur rem mutare. *Everh. in Top. loc. à Defect. Formæ 10. num. 1.* & mutatâ formâ res abesse nominatur *l. 13. §. 1. ff. de V. S.* cum potentia ejus præstantior materia *l. 38. ff. de Legat. 3.* Methodi itaque lege brevibus illa ipsa jam nunc attin-

gen-

genda erit. Consistit autem illa in reali actorum inferioris instantiæ avocatione, judicisque inferioris inhibitione, ut ab omni ulteriori cognitione in tali causa desistat. Illa autem Avocatio est vel expressa vel tacita: Utraque verò fit vel ad Instantiam partis, vel motu proprio.

§. II.

Expressa Avocatio est, quæ fit, quando Princeps, vel alius Magistratus superior literas ad inferiorem mittit, mediantribus quibus per verbum **AVOCAMUS** causæ cognitionem coram inferiore huc usque pendentem ad se, vel ad suum tribunal vocat. An autem in Expressa Avocatione requiratur, ut apponatur vocabulum **AVOCAMUS**, controvertunt Doctores. Et quanquam nonnulli magni nominis JCTi in cap. 56. X. de Appell. tradiderint ad Avocationis subsistentiam pertinere verbi **AVOCAMUS** appositionem, ita, ut literæ in quibus illud est omissum haut valeant. Rebuff. d. tr. quest. 3. num. 14. Attamen hanc voculam ad Avocationem firmandam, haut esse necessariam rectius existimamus, præsertim nisi praxis & curiæ stylus, ut illa apponatur, expressè requirat: cum aliàs ex literis ad inferiorem missis de expressa superioris voluntate constet. De jure enim communi nullà solennitate præscriptâ Avocatio procedit, quo judicium solvitur, nulla vocabuli **Avocamus** facta mentione, vetante scil. eo, qui judicare jusserat. l. 58. ff. de jud.

§ III.

Tacita Avocatio est, quæ fit, quando superior de causa aliqua coram inferiori tribunali pendente cognoscere incipit. Lancell. de Attent. part. 2. cap. 10. num. 9. vel illius cognitionem alii committit, vel ut hoc fiat, de-

cernit. Rebuff. *d. tr. const. 3. num. 16.* Schrad. *de Feud. part. 1. sect. 1. num. 180.* Lancell. *dict. cap. num. fin.* Hoc enim casu videtur adimere cognitionem istius causæ ab eo, ad cujus forum illa in prima instantia spectabat. *cap. 3. X. de Rescript.* ibique Dd. communiter. *cap. 14. eod.* Hanc solent vocare Avocationem Indirectam : Illam verò Directam.

§. IV.

Hasce autem inter Directam seu Indirectam , seu quod eodem recidit, inter Expressam & Tacitam Avocationem hac vice notare volumus differentias : 1. Quod expressâ Avocatione factâ inferior non possit de causa avocata non tantum quoad partes litigantes, sed etiam quoad tertium, qui poterat comparere, cognoscere, quod tamen in tacita haut prohibetur. *uti Dd. in cap. 3. §. In alium quoque. de Appell. in 6.* Lancell. *tr. de Attent. cap. 10. num. 11.* 2. Quod post expressam & insinuatam Avocationem non valeat Processus ab inferiore factus, etiamsi pars non opposuerit Avocationem, quod tamen secus in tacita.

§. V.

Avocat autem Princeps aliusve superior vel *motu proprio*, vel ad *Instantiam partis*. Motu proprio fit, quando ob prægnantem causam citra partis petitionem ad sui iudicii cognitionem litem transfert. Causæ autem, quæ hoc modo avocationi sunt subjectæ, non possunt determinari, cum hoc ipsum liberrimæ superioris relictum sit voluntati : Communiter autem esse solent magni momenti quæstiones. Differt itaque hac in parte Avocatio ab Appellatione , hæc enim nunquam motu proprio, sed tantummodo ad partis instantiam conceditur *l. 14. C. de Appell.*

§. VI.

§. VI.

Ad Avocationem motu proprio factam notare Dd. vulgò solent , quod per hanc judicis inferioris cognoscantis jurisdictio revocetur, licet istiusmodi avocationis sit inscius , & hanc sententiam vocat Rebuff. cum Imol. & Panormit. communem *d. tr. de Evoc. qu. 3. num. 18.* hac additâ ratione, quoniam motus proprii Clausula etiam ante intimationem effectum suum suspensivum operatur. Sed non videtur hæc Clausula talem habere effectum, quod Avocatio talis ante scientiam per intimationem vel aliter judici inferiori factam gesta rescindere queat. Siquidem non verisimile videtur, superiorem illâ avocatione velle afficere ignorantes. Jurisdictio quippe semel data & competens non censetur ab eo revocata, donec ipse habuerit revocationis scientiam atque cognitionem. *l. 17. ff. de Off. Pras. Covarr. Pract. Quæst. cap. 9. num. 7.*

§. VII.

Ad Instantiam seu petitionem partis solet quoque fieri Avocatio, quando pars superiorem judicem supplicando adit, ut causam coram inferiore cœptam avocet atque ad suam cognitionem transferat. Et hæc si fuerit impetrata, non prius tollit Jurisdictionem judicis inferioris, quàm si fuerit per impetrantem Avocatio exhibita atque objecta, *cap. 4. X. de Restit. spoliat.* Hæc enim Avocatio hanc habet conditionem, si is, qui eam obtinuit, illâ uti voluerit. Covarr. *pract. quæst. cap. 9. num. 9.* ut ut nonnulli contrarium, quod nimirum saltem scientiâ judicis inferioris jurisdictio revocetur , defendunt, quos vide *cit. loc.*

§. VIII.

Ut autem pars causæ Avocationem impetret , primum

mum omnium necesse est, ut supplicationem, sive libellum, uti communiter vocari solet *l. 1. C. de prec. Imp. off.* superiori iudici offerat, in quo debet proponere causam, quam habere prætendit, & ob quam avocationem petit. Causa autem in illo libello allegata debet esse vera atque iusta, cujus veritatem priusquam Avocatio concedatur allegans debet probare. Non enim sufficit aliquid asserere, sed probatione opus est. Quâ sufficienter probatâ & pro iusta habita Avocatio solet concedi, literæque sigillo Magistratus superioris munitæ conficiuntur, in quibus causa Avocationis exprimitur: quod tamen secus, quando motu proprio causa avocatur, hoc enim casu non expressè in revocatione exprimenda est causa, quippe quæ in superiore, quare ita facit, residet. Didac. Hydalg. de los Casos *quæst. for. 41. num. 163.* Quæ literæ postmodum præsentantur iudici, coram quo causa pendet; quarum exemplum etiam adversario supplicantis est dandum *l. 1. §. 3 ff. de Edendo.* Quibus denique legitimo modo insinuatæ acta coram priori iudice agitata deferuntur ad iudicem avocantem, sive ad illum, cui causa post Avocationem est commissæ. In primis autem ille debet producere acta, qui avocationem procuravit. Guid. Pap. *Dec. 440. Mart. Neapol. Dig. Nov. Tom. 1. tit. Causa. cap. 5.*

§. IX.

Devolvitur autem Causæ cognitio per Avocationem ad superiorem in tali statu, in quo est apud iudicem inferiorem. Carpz. *lib. 2. Resp. 20. num. 5. & Decis. 97. num. 7.* Valent itaque omnia, quæ ab inferiore sunt gesta ante Avocationis scientiam, imò si Avocatio facta fuerit ad petitionem, etiam ad literarum exhibitionem gesta valida perhibentur à Dd. *in cap. 3. X. de Restit.*

spoliat. vid. Covarr. d. quest. 9. num. fin. nec revocari possunt l. 5. §. 2. C. de Rec. arb. Incipit enim cognoscere Advocans ab illo tempore, quo ultima acta fuerunt legitime à iudice inferiori conscripta. Hinc quoque, quando in Camera Imperiali ob denegatam iusticiam Processus decernuntur, tunc reassumitur causa in tali statu, in quo tempore decreti & insinuatii processus est inventa, uti expressè est sancitum R. M. des Depurationen Tag zu Speyer de anno 1600. §. 27. his verbis: Ob auch Promotoriales cum effectu devolutivo causa Principalis ohne Unterscheid/ es sey gleich die Sache coram iudice inferiore anhängig gemacht/ darinn lis contestiret/ oder auch definitivè concludiret / oder nicht / an Unserm Kayserslichen Cammer Gericht zu erkennen/ also daß wann innerhalb der in den Promotorialibus bestimmter Zeit dem Supplicanten zu Recht nicht verholffen wird/ alsdann die Haupt-Sache alsobald in dem Stande dieselbe befunden/ angenommen und erörtert möge und solle werden. Et tantum quoque de Forma, nunc brevibus etiam consideremus

CAPUT V.

De

Fine & Effectu.

§. 1.

Potissimam omnium causarum causam finem esse, rectissime concludit Navitz. *Conf. 50. num. 22.* & nullus tam facile in dubium vocare potest: Quippe ex eo perspicitur omnis rei utilitas atque fructus, & apparet cujusmodi res sit habenda Schrad. *de Feud part. 10. sect. 1. num. 179.* Unde quoque finis, ad quem omne negotium tendit

G

ma-

magis est considerandus, quàm Principium Gail, *lib. 1. de pac. publ. cap. 16. num. 4.* Finis autem Avocationis est vel Principalis, vel Minus principalis. Principalis concernit tam Utilitatem publicam, quàm privatam. E re enim pariter ipsorum litigantium ac Reipubl. est, ut justitia purè administretur, litesque quam primùm fieri potest, finiantur. *l. 13. pr. C. de judiciis. l. 4. §. 1 ff. de alien. jud. mut. caus. l. 21. in f. ff. de reb. cred. Carpz. lib. 2. Resp. 21. num. 12.* Hunc finem intendere videtur Superior non tantùm si ad partis petitionem causam à judicib. suspectis, vel dene-gantib. aut protrahentibus justitiam, vel in partes nimi-ùm favientibus avocet ; Sed etiam quando motu pro-prio causarum cognitionem ad suum transfert judici-um, putà propter gravitatem causæ, ob quam partes exi-mere vult, ne inde lædantur. Finis Minus principalis est judicis inferioris negligentiam atque favitiam in judi-cando committentis coërcitio. Ab eo enim Jurisdictio per avocationem adimitur atque ad superiorein trans-fertur. Gail. *lib. 1. obs. 28. num. 1.*

§. II.

Effectus Avocationis talis ferè est, qualis est Appel-lationis , cum Avocatio habeatur loco Appellatio-nis. Berlich. *lib. 1. Concl. 6. num. 25.* Sicuti enim Appella-tione legitimè factà nihil à Judice à quo est innovandum. *l. 1. ff. Nihil innov. appell. interp.* sed causa in pristino sta-tu, in quo post litis contestationem fuit, remanere de-bet Hartm. Hartm. *tit. 1. Obs. 3. num. 3.* ita ut executio sententiæ latæ suspendatur. Henning. Gœd. *Consil. 56. num. 10.* Sic quoque Avocatione à superiori factà inferi-oris manus ad eò ligantur, ut ab omni ulteriori superlè-dere debeat cognitione, haut aliter atque sibi esset inhi-bitum. Vultej. *ad l. 1. C. de Jurisd. omn. jud. num. 173.* Gyl-mann.

mann. Symph. *vol. 1. part. 2. tit. 11. vol. 6. num. 13.* Deindè quoque Appellatione interposità prior sententia haud planè exstinguitur, sed potiùs suspenditur. *l. 32. §. 3. C. de Appell.* ita quoque acta ante Avocationem legitimè facta à superiore haud solent esse nulla ac irrita, sed causa devolvitur ad superiorem in tali statu, in quo tempore avocationis fuit. uti §. 9. *antec. cap.* est ostensum.

§. III.

Non autem per omnia & in omnibus Avocatio & Appellatio effectum habent æqualem. Siquidem Appellatio interdum & præprimis de Jure Canonico non totam devolvit causam ad superiorem, sed illum tantum articulum, in quo appellans, se per interlocutoriam Judicis sententiam gravatum putat. *cap. 4. §. f. de Appell. in 6.* Per Avocationem verò causa cum omnibus suis pertinentiis ad superiorem devolvitur. Deinceps & hæc notetur differentia, quod Jurisdictio redeat ad judicem à quo est appellatum, si appellatio fuerit deserta *cap. 5. X. de Appell. cap. 3. in Clem. eod.* aut si appellationi ab appellante fuerit renunciatum *l. 28. C. de Appell.* quod tamen secus in Avocatione. Judex enim inferior avocatione à partibus deserta, neque de consensu partium & litigatorum sine expressa superioris remissione potest cognitionem reassumere. Covarruv. *cap. 9. pract. quest. n. 5.* vid. quoque expressam constitutionem Electoris Brandenb. quæ habetur in *Constit. March. part. 2. tit. 3. §. 6.* in verbis: Soll demnach der Richter mit nichten die Sache wiederum in seine Gerichte fodern / oder die zu richten sich unterstehen / es würde denn die Parthey und Sache durch dem / der sie abgefördert / wiederum dahin gewiesen.

§. IV.

Ut autem Avocatio legitimè sortiatur effectum, necesse est, ut tam iudex, à quo cognitio causæ avocatur, quàm partes litigantes illius Avocationis habeant notitiam. Ante enim literarum & voluntatis avocantis intimationem gesta ab inferiore valida sunt, nec Attentatorum nomine veniunt. Lancell. *tr. de Attent. part. 2. cap. 9. num. 21. & seqq.* Ratio est evidens, quoniam scientes, non verò ignorantes obligantur. *l. 3. C. de tabul. scrib. ante præsentationem & receptionem enim non potest dici, iudicem inferiorem habere avocationis scientiam; Unde nec ab eo gesta ante scientiam nulla erunt. Paria enim sunt non esse, & non apparere arg. l. 30. ff. de testam. tut. & avocatio antequam appareat perinde est, ac si non esset, unde intimatione opus est.*

§. V.

Scientiæ autem hujus ratione distinguunt Doctores inter Avocationem motu proprio & ad instantiam partis factam. In hac quidem intimatione & exhibitione literarum avocatoriarum opus esse, & nisi à parte impetrante illæ literæ sint exhibitæ, valere omnia, quæ à iudice inferiore ad exhibitionem usque sunt gesta, unanimiter concludunt: quod tamen aliter in Avocatione motu proprio, ubi tantummodo simplicem Avocationis notitiam requirunt. vid. Covarr. *præf. quæst. cap. 9. num. 8. §. Tertia conclusio &c.*

§. VI.

• Hanc etiam, cum diximus, acta rescindi demum in Avocatione post scientiam inferioris iudicis, sententiam limitant Doctores in casu, quando Avocatio *Decreto Irritanti*, quo omne decernitur irritum atque inane, quicquid in contrarium à iudice inferiore actum fuerit, est facta.

facta. De natura enim hujus Decreti est, ut refert Lancell. *tract. de Attent. cap. 10. num. 27.* afficere ignorantes. Contrarium tamen rectius sentire videtur. Covarr. *d. cap. 9. pract. quest. num. 7.* motus hisce rationibus : Primò enim dicit, posse quem renunciare his, quæ sunt in favorem ejus inducta, licet his accesserit Decretum tale, quo acta in contrarium irrita decernuntur. Deinde, inquit, Principis voluntas in hoc tendit, ut hujus decreti vis remittatur, si eidem renunciaverit, qui id à Principe in proprium favorem obtinuit. Eadem voluntas præsumenda est in legis conditore ad hunc effectum, ut lex ab eo lata non liget ignorantes, nec eos prohibitione, præcepto aut pœna afficiat. Siquidem optimus princeps in id debet ac tenetur leges ab eo latas dirigere, quod magis sit justitiæ consonum. Et ideo præsumendum erit, quod ipse nequaquam voluerit propria lege ejus inscios & ignaros afficere, quoties ea ignorantia culpâ caret, licet Decretum hoc, cujus modò vim tractamus legi adjecerit.

CAPUT VI. & ultimum,

De

Contrariis & Affinibus.

§. I.

EXcussis iis, in quibus Avocationis Effectus consistit, nunc etiam pauca de illius contrariis & Affinibus leviter delibando subjungemus. Avocationi autem maxime obstant Attentata, quæ sunt innovata illegitima

G 3

post

post causæ Avocationem ab inferiore facta. Judex enim inferior facta Avocatione ab omni ulteriori cognitione supersedebit, haut aliter atque sibi esset inhibendum. *Vultej. ad l. 1. C. de Jurisd. omn. jud.* Et quemadmodum pendente appellatione nihil est innovandum *t. t. ff. nihil innov. app. interp. cap. 7. de Appell. in 6. Ordin. Cam. part. 3. cap. 37.* & quicquid innovatur Attentatum dicitur; ita quoque post avocationem gesta non simpliciter tantum Attentata dicuntur, sed magis attentata, quam ea, quæ sunt appellatione pendente. *Lancell. part. 2. de Attent. cap. 10. num. 1.* Ratio hæc fortasse est, quoniam in causa Appellationis ut privilegium attentatorum locum sortiatur, requiritur, ut justè ac legitimè Appellatio sit interposita *l. 7. C. de Appell.* ubi enim Appellatio est nulla, ibi etiam nulla sunt Attentata *cap. 5. de Appell. in 6. Lancell. tr. de Attent. cap. 12. limit. 6. num. 1.* quod tamen secus in Avocationibus. Etenim, quando ad causæ cognitionem per Avocationem manus superior apposuit, inferior non potest sese ulterius intromittere, sed omnia ab eo facta nulla & attentata perhibentur, non obstante, an Avocatio sit justa, an verò injusta. Ratio diversitatis in hoc consistit, quoniam Appellatio est juris, Avocatio verò facti dicitur, quoniam hæc à sola dependet voluntate superioris, & idcirco sive injusta, sive justa operatur suum effectum. *Rebuff. tr. de Evocat. quest. 11. num. 107. Lancell. d. tr. cap. 10. num. 7.*

§. II.

In tantum autem gesta post Avocationem dicuntur Attentata, ut ea, quæ judex inferior de partium etiam consensu innovavit, illorum nomine veniant. Impedit enim Avocatio emissæ, quo minus inferior stante hujusmodi avocatione, etiam de partium consensu procedere pos-

possit; Lancell. *d. tr. cap. 10. num. 3.* Schrad. *de Feud. part. 10. sect. 1. num. 180.* præsertim ubi Avocatio facta fuerit motu proprio cum Clausula Irritanti. Rebuff. *d. tr. quest. 11. Diff. 12.* Si enim hoc casu absque expressa remissione judicis superioris inferior causæ cognitionem reassumat, superioris auctoritas non minimum læditur. Rebuff. *cit. loc.* Quod tamen secus, quando quis Avocationem ad instantiam in proprium favorem impetravit. Covarr. *dict. cap. 9. num. 7.* tunc enim, si impetrans isto Rescripto avocatorio uti nolit, illi renunciare non prohibetur, ita, ut iudex inferior absq; expressâ remissione superioris possit validè procedere, etiamsi habeat avocationis noticiam. Lancellott. *d. cap. num. 33.* Superioris enim voluntas in id intendit, ut hujus decreti vis remittatur, si eidem renunciaverit, qui id in proprium favorem obtinuit, uti suprà ex Covarruv. retulimus.

§. III.

Hanc Regulam, quod gesta post Avocationem sint nulla, limitant Doctores in casu, quo Clausula, *Quatenus causa non sit instructa*, Avocationi est adjecta. Stante enim dicta Clausula iudex ulterius procedens attentare haur dicitur, uti multis Doctorum auctoritatibus tradit Lancellot. *d. cap. 10. num. 16.* Instructa autem causa dicitur, quando pro altera parte probationes factæ sunt, & pro illa pronunciari potest. Mart. Neap. *Dig. Noviss. Tom. 1. tit. Causa. cap. 32.* Vel Causa instructa est secundum Lancellottum *dict. loc.* quando de ea liquet. Liquere autem dicitur, quando est conclusum in causa, ut tempore avocationis iudex inferior possit pronunciare. vid. plura apud citat. Lancellot. quo casu non ob-

stante

Stante inhibitione à superiore emanata , primus iudex
pronuntiare potest. Mart. Neapol. *d. t. cap. 33.*

§. IV.

Nunc denique considerata essent Avocationis
Affinia, quæ sunt Remedium supplicationis, Appellatio-
nis & Revisionis. Verùm cum unumquodque horum
peculiarem mereatur explicationem, hic abrumpimus.
Qui autem horum explicationem desiderat , consulat
Petrum Rebuff. qui conscripsit singularem Tractatum
de supplicationibus, qui habetur *in Comment. ad Constit.
Regias.* De Appellatione Sigism. Scacciam, Christoph.
Besoldum, Guid. Papam, Cæsar. Ruginellum, Joh. Fer-
rarium Montanum, Joh. Melch. Cletzelium, Cornel.
Brederod. & alios, qui de hac materia integros scripsere
tractatus. De Revisione vide Conclusiones Practicas
de Revisione actorum & sententiarum in Camera pro-
nunciatarum Joh. Ludov. Benderi. Ad quos B. L. hac
vice remittimus & hisce Bono cum DEO pedem figimus.
Et licet multa ad hanc materiam spectantia restent, ta-
men ego nunc ista

Spatiis exclusus iniquis
Prætereo, atque aliis post me memoranda relinquo.

DEO TRIUNI
GLORIA.

